

虫

薈

蟲薈卷二目錄

麟

麟主

嗅石

符拔

白澤

周匝

藥獸

舍利獸

受福獸

獅子

獠

獸吻

招賢獸

獨步獸

虎

黑虎

鯨虎

肉翅虎

彪

敦圉

螭

騶虞

羅羅

獨裕

威夷

馬腹

檣机

開明

闢非

豹

土豹

水豹

海豹

元豹

青豹

金線豹

果下豹

狢

孟極

嗽月

決陽

終

猙

諸犍

犀

水犀

明犀

白犀

兕

水兕

象

野象

豫

鼻角

熊

天鐵熊

魑

羆

能

貔

貉

猎猎

懶面

蘇

橐駝

玉駝

風腳駝

飛駝

石駱駝

鹿

獐虎

馬鹿

駝鹿

赤鹿

天鹿

靈鹿

兩頭鹿

飛骸獸

把雜爾

猓如

夫諸

無損

角端

麋

罷

娑胡

麋

麋

麋

麋

方輝

麋

水麋

麋

猶

馬

野馬

仙馬

海馬

山馬

水馬

旄馬

龍馬

肉角馬

果下馬

騊蹄

騊駼

吉驥

駒駼

蛩蛩

鹿蜀

犴

駮

驪

臄疏

獨角

駸駸

孰湖

馬哈獸

驢

野驢

海驢

黑驢

福祿

皮樹

騾

駮騾

牛

水牛

山牛

野牛

海牛

神牛

麒麟

駝牛

犂牛

牦牛

犏牛

犛牛

犂牛

犝牛

犏牛

青牛

犁牛

花蹄牛

白皮牛

茲白牛

長角牛

罷達

那父

犛

蜚

領胡

犀渠

精精

窮奇

獬豸

諸懷

夔

獬

獬豸

豹

撒刺漫大辣

羊

夏羊

水羊

獬羊

羚羊

乳羊

莧羊

豪羊

綿羊

玉羊

墳羊

紅羊

黃羊

羴羊

龍羊

鬪羊

羴羊

封羊

羴羊

胡羊

野羊

羴種羊

野青羊

大頭羊

大尾羊

羴

獬薦

辣辣

羴

獬

獬

驪

犬

鮑犬

蠻犬

鬱林犬

犴

禍斗

草上飛

獬豸

獒

渾沌

獬

獬

狡

獬

山獬

天馬

馬見愁

碧芬

海狗

田狗

竹狗

木狗

鷹背狗

般第狗

佛林狗

西番狗

蠅

谿邊

彭侯

宰

狗獾

海獾

豺

狼

豺狼

麋狼

地狼

狔狼

狔

狔

謁狙

獲落

意夜納

豕

野豬

豪豬

豬獾

嬾婦

倉唐

穰

猧猧

當康

狸力

聞麟

山膏

駭神

合窳

蠶蜥

猾褊

孟槐

鼈封

猩猩

格

狒狒

磬礪

野婆

魍

刑天

蜎蜎

視肉

蠱雕

文文

猿

獬狔

獨

朱厭

雍和

狨

果然

蒙頌

猴

石猴

狢

前兒

厭火

騰豻

巫支祈

饅父

獬

康

狢

狸猴獸

禺

幽鵠

長右

足訾

狐

九尾狐

天驕

射干

朱孺

獬獬

豻

乘黃

狸

虎狸

山狸

海狸

風狸

火狸

香狸

囊狸

五段狸

九節狸

玉面狸

狢

梁渠

天狗

朏朏

謹

狴

貉

麝

獬

破鏡

猯

貓

亞爾加里亞

獺

山獺

海獺

兔

狡兔

吼

齒狗

獺

狢狢

訛

鼠

天鼠

地鼠

山鼠

海鼠

水鼠

火鼠

冰鼠

仙鼠

虎鼠

蝟鼠

青鼠

白鼠

黃鼠

鼯鼠

鼯鼠

竹鼠

苗鼠

鼯鼠

鼯鼠

鼯鼠

鼯鼠

鼯鼠

鼯鼠

鼯鼠

鼯鼠

香鼠

鼯鼠

義鼠

壓鼠

鼯鼠

耳鼠

飛鼠

易腸鼠

鼯鼠

紅飛鼠

褐特鼠

沙磧鼠

山枳鼠

鼯鼠

蠻蠻

乙苟滿

猴

蜎

山狔

朱瑪納哈

瞎撞

黃腰

狙如

難

蟲薈卷二

睦州方旭

毛蟲

麟

鵠冠子註 牝曰麒麟者其牡也麒麟無角。旭
按說文又以麒爲牡麟爲牝

莼林伐山 般般麟也

譯史紀餘 麒麟高昌呼哈

西番譯語 麒麟西番呼吉隣

八紘譯史 麻林國產麒麟。旭按爾雅正義云并
州界有麟大如鹿非瑞獸故司馬相如賦曰射麋脚

麟謂此麟也據此則麟亦有兩種

草木蟲魚疏 麟麋身牛尾馬足圓蹄黃色一角角
端有肉音中鐘呂行中規矩遊必擇地審而後處不
履生蟲不折生草不羣居不侶行不犯陷阱不罹羅
網王者至仁則出

筠廊偶筆 麟甲四周五彩環繞如月華狀

駢雅 麟牡鳴曰遊聖牝鳴曰歸和夏鳴曰扶幼秋
鳴曰養綏

抱朴子 麒麟壽三千歲

大戴禮 毛蟲三百六十麒麟爲長

公羊傳 麟非中國之獸有王者則至無王者則不至

六書故 陸璣因麟爲瑞獸遂從而附會之曰不履生蟲不踐生草果何食乎不羣居不侶行是懷孤德也不入陷阱不罹羅網王者至仁則出何爲而獲於子鉏商至言音中鐘呂行中規矩愈夸誕矣

正字通 爾雅翼辨後世論麟者角端有肉馬足圓蹄黃色及有翼能飛之謬而獨惑於淮南子麒麟鬬日月食之說謂歲星散爲麟歲失其序則麟鬬麟鬬則日月食不知月揜日而日爲之食月亢日而月爲

之食春秋屢書日月食並不由麟鬪也

談薈 龍與牛交生麒麟

灤陽消夏錄 麟本仁獸實非牛種犢之麟而角乃
雷雨時蛟龍所感耳

麟主

談薈 神鳥山有獸曰麟主能服衆獸卻百邪溺則
虎仰首張口受之

嗅石

拾遺記 瀛州有獸名嗅石狀如麒麟不食生草不
飲濁水嗅石能知石中金玉所在吹石卽開

符拔

後漢書西域傳 章和元年安息國獻符拔似麟無角○旭按卽桃拔也見前漢書

白澤

黃帝內傳 帝巡狩至東海登桓山得白澤獸能言語達萬物之情

周匝

瑞應圖 周匝神獸也知星宿之變化王者德盛則至○旭按周匝卽宋符瑞志之周印也又淮南子云歸終知往註歸終神獸也又談薈云天上有神獸曰

遊騏又上林賦註云飛遽神獸也鹿首龍身

藥獸

八紘荒史 神農時白民國貢藥獸人有疾與獸語
獸卽銜草歸服之立愈

舍利獸

談薈 舍利獸能吐金

受福獸

談薈 受福獸體恭心慈

獅子

爾雅 狻猊如虬貓食虎豹 註卽獅子也出西域

西番譯語 獅子西番呼星傑

正字通 獅子梵書名僧伽波說文言卽白澤本草
言其一名虤並非

廣輿記 獅子出占城及哈烈于闐忽魯謨斯等處
八紘譯史 博爾都阿拉產獅子其形稍類虎毫含
金色淺淡如灰其尾像拂熟睡時每搖動示人不寐
食禽獸但以口吹之羽毛皆落生子必置之深窟若
爲人所盜獅子必追去惟以綵毬擲與之卽自搏跳
三迫三擲遂舍其子震吼而歸

潞陽消夏錄 康熙十四年西洋貢獅子其身如黃

犬尾如虎而稍長面圓如人不類他獸

聖祖

南巡回鑾時繫船頭將軍柱上縛一豕飼之豕在岸
猶號叫及置獅前獅俯首一嗅已怖而死臨解纜時
忽一震吼聲如無數銅鉦陡然合擊外祖家廐馬十
餘隔垣聞之皆戰栗伏櫪下船去移時尙不敢動
本草綱目 獅子似虎而小黃色亦有青色者銅頭
鐵額弭耳昂鼻鋸牙鈎爪目光如電吼聲如雷牡者
頷下有鬚尾端有茸毛怒則威在齒喜則威在尾
吼則百獸辟易馬皆溺血死則虎豹不敢食其肉蚊
蚋不敢集其身其屎極臭服之破宿血殺百蟲燒之

辟鬼魅或言卽蘇合香誤。旭按述異記云南金山有獅子獸其毛黃赤而光鮮耳小鳴則地動石裂又拾遺記云晉武帝時因墀國獻五足獸狀如獅子坤輿外紀獅子畏雄雞及車輪之聲又常患瘧四日卽發一度

酉陽雜俎 獅子筋爲絃鼓之眾絃皆絕

𧇖

廣韻 𧇖如獅子食虎豹

神異經 北方大荒中有獸曰𧇖好入人室咋人則疾於是黃帝殺之

獸吻

支雅 獸吻似獅子好食陰邪故刻其形於門環上

招賢獸

天中記 招賢獸出摩伽佗國其形如獅子若國用賢良此獸乃見

獨步獸

天中記 良州有獨步獸其行有意氣故名畜之可以辟鬼魅

談薈 獨步獸似獅子而虎頭豹尾文身黃角

虎

方言 虎陳魏宋齊間曰李父江淮南楚間曰李耳
或曰鷓鴣關東西曰伯都

事物原始 嘯風子白額將軍皆虎別名

譯史紀餘 虎高昌呼把兔思緬甸呼賈

西番譯語 虎西番呼思答

隴蜀餘聞 蜀地多虎

續廣雅 山東無虎

正字通 虎似貓而大如牛首尾七尺黃質黑章鋸
牙鈎爪兩脅有威骨如乙字長一寸佩之令人有威
尾端亦有之不及脅骨良又世傳人死於虎魂不他

適常隸事虎名曰偃鬼凡虎出行偃爲前導呼虎曰將軍虎死則哭之又聽雨記談曰人遇虎衣帶自解別置他所虎見人輟而後食之皆偃所爲按此兩說多不足信。旭按今獵人射虎必先以土缶納雞子兩枚於其中上加一箸置於路側云以飼偃鬼據此則偃鬼之說似未嘗無

支雅 虎腎懸於腹

格物論 虎一生止一乳乳必雙死必倚巖石未嘗撲地

本草綱目

郭璞云虎食物至耳則止故呼李耳應

劭云南郡李翁化爲虎故呼李耳皆不經之談今處
處有之孕七月而生其夜行一日放光一日視物獵
人候而射之弩箭纔及日光卽墮入地掘下深尺餘
有物如石子謂之虎魄能治小兒驚癇其鼻懸門中
一年取作屑與婦人食之便生貴子但勿令婦人及
他人知知則不驗孟詵曰虎肉止瘡又治三十六種
精魅蘇頌曰虎係藥箭射殺者不可入藥陳藏器曰
虎屎燒末酒服治諸獸骨鯁

酉陽雜俎 牙痛以虎鬚插之卽愈

風俗通 人卒得惡病燒虎皮飲之良繫其爪亦辟

惡

續博物志 虎食狗則醉

述異記 虎千歲則牙蛻角生

談薈 虎每月望前耳能聽而目不能視望後目能視而耳不能聽其曾食人者耳必有缺

見聞錄 虎不食幼兒及醉人以其不知懼也其食人男子必自勢起女子必自奶起

廣異記 開元末渝州多虎人設機陷之終不得乃登樹候之見一佷鬼如七八歲小兒無衣通身碧色先來發機而去人俟其過仍下樹止之須臾虎來爲

機所中而死久之小兒哭而返尋入虎口人剖視之
見一碧石在虎喉中

淮南子 虎有子不能攫搏者必殺之爲其墮武也
金樓子 山中寅日稱虞吏者虎也

爾雅正義 白虎曰魑黑虎曰魍淺毛曰玃貓○旭
按此又別其色之黑白毛之深淺而名之又拾遺記
云魏時樂浪獻虎其文如錦又談薈云晉太康六年
有兩足虎

綱鑑通俗 貴州婦女往往爲虎所攫若過宿不食
而生還者久必化虎其化也有雄虎往來門外女郎

神癡據地數日後口濶目突而毛生焉其雄虎卽以爲配蓋虎不再交惟此虎屢交不懼亦不甚傷人

黑虎

入紘譯史 滿刺伽產黑虎能變人入市

鯊虎

譯史紀餘 鯊虎南海鯊魚所化文直而疏與常虎別

肉翅虎

赤雅 肉翅虎出石抱山晨伏宵飛食人其翅如蝙蝠文如虎佩其皮可辟百鬼○旭按卽飛虎也毛灰

色充侗竹枝詞云阿魯地最多

彪

國史補 裴旻守北平北平多虎旻善射常一日斃
三十一虎旻而一老父至曰此彪也似虎而非將軍
欲見真虎自此而北三十里往往有之旻躍而往果
一虎出狀小而勢猛據地一吼山石震裂旻馬辟易
幾不得免嗣後不復言射虎

敦固

淮南子註 敦固似虎而小

玃

南山經 浮玉山有獸曰羆狀如虎而牛尾音如吠
犬食人

騶虞

正字通 騶虞曾耳也或作騶吾或作騶牙。旭按
曾耳或又作尊耳

海內北經 騶吾大如虎五彩長尾乘之日行千里
草木蟲魚疏 騶虞白虎也黑文尾長於軀不食生
物不履生草

史記 漢武帝得一獸狀如麋以問羣臣莫有知者
東方朔曰此騶牙也其齒前後若一齊等無牙故名

鬻牙凡四方歸義則見

瑞應圖 鬻虞見虎豹則殺之

羅羅

海外北經 北海有青獸狀如虎曰羅羅

獨裕

北山經 北囂山有獸曰獨裕狀如虎而白犬首馬

尾豕鬣

威夷

爾雅 威夷長脊而泥 註泥少才力○旭按卽委

虓似虎有角好行水中

馬腹

中山經 蔓渠山有獸曰馬腹人面虎身其音如嬰兒是食人

檮杌

神異經 西方荒中有獸狀如虎而大毛長三尺人面虎足豬口牙尾長一丈八尺攪亂荒中名曰檮杌一名倣狼一名難馴。旭按述異記云封微山有怒毛獸不怒毛三寸怒則毛三尺卽此類與

開明

海內西經 崑崙山有獸曰開明身大類虎而九首

皆人面

闌非

海內北經 闌非人面獸身青色

豹

本草綱目 豹一名程胎至美爲八珍之一肉亦無
毒惟正月忌食能傷神損壽

正字通 豹似虎而小白面毛赤黃其文黑如錢圈
者曰金錢豹宜爲裘如艾葉者曰艾葉豹次之。旭
按又有赤色而文黑者曰赤豹白色而文黑者曰白
豹

譯史紀餘 豹緇甸呼謝

西番譯語 豹西番呼席

廣輿記 豹產山西及陝西洮州衛岷州衛

談薈 虎生三子一爲豹

臺灣紀畧 臺灣出豹然不噬人

土豹

西番譯語 土豹西番呼夷黑葛兒

廣輿記 土豹產陝西及女直人呼失刺孫呼其皮

爲舍里孫

本草綱目 土豹毛無文色亦不赤其形亦小

水豹

本草綱目 海中有水豹上應箕宿

海豹

廣輿記 海豹產朝鮮及女直

潛確類書 海豹五色聚占水涯常以一豹護守如
雁奴然得之皮可飾鞍褥

元豹

本草綱目 川西有元豹狀如狗而色黑其皮爲裘
褥甚煖冬月裹食數日不冷彼處亦貴重之。旭按
山海經云幽都之山多元豹未識卽此否

青豹

洞冥記

青豹出浪坂山狀如虎青翠色食之不愚

金線豹

本草綱目

西域有金線豹文如金線

果下豹

羅山記

羅山有豹小似猴文采蔚然南海人呼果

下豹

狢

北山經

隄山有獸曰狢狀如豹而文首

孟極

北山經 石者山有獸曰孟極狀如豹而文題白身
其鳴自呼

噉月

拾遺記 岱輿山有獸曰噉月形似豹夜則口噴白
氣其光如月照數十丈

洸陽

莊子註 洸陽豹頭馬尾或曰狗頭

獐

正字通 獐似豹有角

獐

西山經 章莪山有獸曰猓狀如赤豹而一角五尾
其音如擊石

諸犍

北山經 單張山有獸曰諸犍狀如豹而牛耳人首
一目長尾行則銜居則蟠

犀

酉陽雜俎 犀一名奴角

本草綱目 犀出西番南番滇南交州有二角鼻角
長額角短其角有花文如魚子形謂之栗文文中有
眼謂之栗眼黑中有黃花者爲正透黃中有黑花者

爲倒透花中復有花者爲重透並各通犀乃上品花如椒豆斑者次之純黑無花者爲下品其通天夜視有光者名夜明犀能通神破水鳥獸見之皆驚陳藏器曰通天者腦上之角經千歲長且銳白星徹端出氣通天也其角以有百物之形者爲極品凡犀角有通天花文者其飲必濁水蓋自惡其形不欲照見也其文有倒插者一半以下通有正插者一半以上通有腰鼓插者中斷不通種類頗多故波斯呼象牙爲白暗犀角爲黑暗言難識也其角每歲一退必自埋於山中海人多作木角潛易之否則再脫必埋他所

李珣曰通天者乃胎時見天上物過形於角上故曰通天蘇頌曰犀角入藥黑者爲上角尖尤勝

抱朴子 通天犀角有白理如線置米中雞往啄米輒驚故一名駭雞犀取其角一尺以上者刻爲魚銜以入水水爲之開

廣輿記 犀產廣西占城暹羅等處

八紘譯史 佛菰產通天犀

爾雅註 犀似水牛豬頭大腹庫腳腳有三蹄黑色三角一在頂上一在額上一在鼻上鼻上者卽食角也小而不橢好食棘亦有一角者

正字通 郭璞言犀有三角一在頂一在額一在鼻
不知在鼻者乃鼻骨非角也

太平廣記 海人取犀先於山路植朽木如猪羊棧
犀前腳直常依木而息木倒犀仆不能起因格殺之
埤雅 山犀二角其角最難搗須鋸成小塊以紙包
納懷中令近肉候人氣蒸潤乘熱搗之應手如粉
談薈 犀體具五種肉其角置狐穴中狐不敢歸
攷工記 犀甲壽百年

林邑國記 犀行過叢林不通便開口露齒向前直
指棘林自開

水犀

異物志 海中有水犀樂聞絲竹管絃之聲人以此誘其出而獲之。旭按或說水犀與山犀無異但水犀皮有珠甲而二申野錄載弘治十七年崇明漁人獲水犀似犬色黑初不知其爲犀因善盜魚驅而入海海水爲之躍乃知是水犀據此則與山犀又不類矣又或說水犀三角

明犀

洞冥記 元封中吠勒國貢明犀狀如水兕而角表有光又名影犀

白犀

中山經 琴鼓山多白犀 註此與辟寒辟暑辟塵

蠲忿諸犀皆異種也。旭按辟寒犀產安南角能辟
寒其色如金辟暑犀角能辟暑辟塵犀卽卻麀獸也
產真臘其角與皮皆可辟塵蠲忿犀碰其角佩之令
人蠲去一切忿怒

兕

本草綱目 兕一名沙犀

交州記 兕出九真一角長三尺餘形如馬鞭柄
四書考 嶓冢山多兕 註山在陝西甘肅相聯處

鬯器子註 兕似牛青色一角

說文 兕角爲酒器名觥

攷工記 兕甲壽二百年

水兕

八紘譯史 占城多水兕

正字通 水兕出水有聲如雷

象

格致鏡原 象一名伽那或名大客或名鈍公子

續廣雅 江猿象也

譯史紀餘 象緬甸呼唱

廣輿記 象產廣西占城暹邏等處

本草綱目 象出交廣雲南西域毛有灰白青黑諸色其身長丈餘高稱之兩目如豕四足如柱無指而有爪甲其耳下顰其鼻大如臂下垂至地鼻中有小肉爪能拾針芥飲食皆以鼻卷入口鼻傷則死耳後有穴薄如鼓皮刺之亦死口內有食齒兩吻出兩牙夾鼻牡者長六七尺牝者長尺餘其交在水中以胸相貼南人多設機阱以陷之或埋象鞋於路以貫其足若捕生象則以牝象爲媒而誘獲之飼而狎之久亦能解人語其肉甘平無毒但食之令人體重○旭

按朝野僉載云安南有象知人曲直遇人爭訟立而
鼻之直者過曲者鼻卷之擲空中又八紘譯史云天
竺有異象識人言土人命負物至何處往輒不爽他
國象遇之皆蹲伏又云亞毘心域產大象一牙重二
百斤

四書經註集証 象能浮水其體具十二肖肉惟鼻
是其本肉其膽隨月轉在諸肉內如正月建寅則膽
在虎肉二月建卯則膽在兔肉或曰象膽春在前左
足夏在前右足秋在後左足冬在後右足
談薈 象三歲而一生若龍與豕交亦生象

經驗方 金瘡不合用象皮灰敷之立瘡

綱鑑通俗 象牙出南番者長大出廣西安南者短

小新鋸開以粉紅色者爲最佳

藥性賦補遺 象牙磨屑出肉中刺磨水服治諸獸

骨鯁

正字通 象每脫牙必掘地自藏人以木牙潛易之

酉陽雜俎 象惡犬獬獵者裹糧登高樹搆熊巢伺

之見羣象過則咸學犬吠象遂舉鼻吼叫不復去或

經四五日困倒其下乃潛殺之其胸前有小橫骨燒

灰酒服令人能浮水

談苑 象耳出油謂之山性發往往奔逸傷人牧者
見其耳有油則多以索縻之

見聞錄 余客荊州見省下小報云外國貢一象重
祇八斤四兩

野象

嶺表錄異 廣之屬郡潮循多野象其牙小而紅堪
爲笏

豫

爾雅正義 豫象屬獸之多疑者

鼻角

坤輿外紀 印度有鼻角似象足短體有鱗皆紅黃
斑點鼻有一角堅如剛鐵若與象鬬必於石上磨其
角觸象腹而斃之

熊

本草綱目 熊俗呼豬熊狀如豕而大豎目人足黑
色春夏臙肥時每升木引氣或墮地自快俗呼跌臙
卽莊子所謂熊經也其當心有白脂如玉俗呼熊白
味美但寒月有之入夏則無其肉無毒陶宏景曰有
瘡疾人忌食食之終身不愈

西番譯語 熊西番呼端

埤雅

熊膽春在首夏在腹秋在左足冬在右足

赤雅

熊足前曰掌後曰蹠獐人呼子路曰子路出

則出曰子路鬪則鬪又有綠者

談薈

熊脂痿陰

抱朴子

熊五百歲能變化

淮南子

熊食鹽則死

異苑

熊性惡穢物捕者置穢物於穴則合穴自死

正字通

熊冬蟄至春乃出其行山中必有跬伏之

所在石巖枯木間謂之熊館其蟄時不食飢則自舐

其掌故掌味美爲八珍之一

天鐵熊

酉陽雜俎 高宗時伽毘葉國獻天鐵熊能擒獅象

魑

爾雅 魑如小熊竊毛而黃 註今建平山有之狀

如熊而小毛淺赤黃色俗呼赤熊○旭按此卽西山經之猛豹上林賦之猛氏也

羆

爾雅 羆如熊黃白文 註似熊長頭高腳猛憨多力能拔樹木關西呼羆羆

本草綱目 羆陸機呼黃熊今俗呼人熊又呼馬熊

或曰卽熊之雄者其白如熊而理粗味減

西番譯語 羆西番呼折

廣輿記 羆產女直

埤雅 羆似熊而大見人則立而攫之其脂在心之下育之上狀如熊白而粗秋冬有之春夏則無

草木蟲魚疏 羆有黃羆有赤羆

爾雅正義 鹿畏羆羆畏虎虎畏羆羆之狀被髮人立而甚害人

能

說文 能熊屬足似鹿。旭按此卽左傳之黃熊也

或曰似熊居水中

貍

方言 貍北燕朝鮮間曰貉陳楚江淮間曰貉

草木蟲魚疏 貍似虎或曰似熊一名執夷一名白

狐遼東人各白羆其子名穀。旭按穀狀與貍不同
詳鼠下又或說貍之牝者曰貉故古人多連舉之

貍

字林 貍一名白豹

字典 貍生南方山澤中圖其形辟邪

本草綱目 蜀地峨眉山中有貍其皮爲褥可驅溫

癘辟濕氣及邪氣

正字通 貌似熊而小象鼻犀目獅首豺髮虎足毛
黑白駁好食銅鐵及竹溺能消銅鐵爲水齒最堅以
鐵椎之鐵皆碎落火亦不能燒人得之僞充佛牙惟
以羚羊角擊之則碎。旭按神異經云南方有獸角
足大小如水牛毛黑如漆食鐵飲水其糞可爲兵器
其利如剛名齧鐵或卽此

猎猎

大荒北經 叔歟國有黑蟲似熊名猎猎

懶面

坤輿外紀 蘇木國有懶面甚猛爪如人指鬣如馬
腹垂至地不能行盡一月不踰百步

蘇

坤輿外紀 蘇產智勒其尾長大與身等獵人逐之
則負其子於背以其尾蔽之急則吼聲洪大令人震
恐

橐駝

爾雅翼 橐駝今呼駱駝

西番譯語 橐駝西番呼兒阿蒙

廣輿記 橐駝產安定哈密火州韃靼兀良祖法兒

等處

本草綱目 駝似馬羊頭長項垂耳背有兩肉峯如馬鞍腳有三節毛有蒼褐黃紫數色其性耐寒惡熱故夏至退毛至盡人多取以爲毡其力能負重可至千斤日行三百里其鳴曰圖其肉甘溫無毒一種卧而腹不着地屈足露明者曰明駝尤能行遠○旭按明駝眼下有毛能夜視日行五百里見楊太真外傳又西域記云郭罕之駝大如中國之驢又南蠻傳云室利佛逝有橐駝豹文犀角以乘且耕人呼它牛豹又南史云滑國有兩腳駝能人立又或說駝有二胃

一受食一受水受水之胃似袋有十二行中皆貯水
遇流沙無水則出胃中水以潤之又或說駝脂在峯
飢則鎔入體中以充腹又紀文達公筆記云駝峯爲
八珍之一然野駝單峯非常駝雙峯也

博物志 燉煌西渡流沙往外國千餘里無水有伏
流人不能知橐駝知水脉遇其處卽停不行以足踏
地人於所踏處掘之卽得水

北史 流沙多熱風爲行旅之患其風欲至惟老駝
知之必預鳴而聚立埋其口鼻於沙中人以爲候亦
以毡自擁口鼻

續博物志 駝糞烟直上能殺蚊虱

埤雅 駝毛褥煖於狐

奉使日記 橐駝涼則五日一飲水熱則二日一飲水若行路須食草足然後飲飲畢少飼以鹽牽則護其鼻蓋鼻壞則駝之精力減也

玉駝

拾遺記 周靈王時韓房自渠胥國來獻玉駝高五丈

風腳駝

洽聞記 于闐有小鹿與駝交生風腳駝日行七百

里

飛駱駝

癸辛雜識 西域雪山有飛駱駝

石駱駝

異域誌 石駱駝腹下出水飲之令人色白西南夷有之

異苑 西域苟夷國有石駱駝腹下出水以杯盞及手承取卽便對過惟葫蘆承取則得飲之令人身體香淨而成仙

鹿

格致鏡原 鹿佛書名伊尼

正字通 鹿梵書名密利迦羅又李時珍云鹿與龍
戲必生異角故鹿一名斑龍按水陸異種必無與龍
戲之理其稱龍者蓋文采似龍也。旭按鹿狀馬身
羊尾頭側而長腳高牡者毛黃色有白斑兩角夏至
角解牝者無角毛雜黃白色亦無斑文又酉陽雜俎
云合浦有鹿頭上戴科簾一支四條直上各一丈又
二申野錄云萬厯二十三年上海得一鹿高丈餘重
五百斤

西番譯語 鹿西番呼厦瓦

孔子家語 鹿六月而生

戒菴漫筆 鹿初生鼻邊有缺者是雄

本草綱目 鹿肉補虛但九月以後正月以前可食
餘月宜忌其尾最美爲八珍之一一種白臆者豹文
者及見水能動曝之不燥者皆有毒殺人其茸中又
有小白蟲視之不見以鼻嗅之必入人鼻爲蟲顙不
可救

古今錄 驗人患妖魅鬼病不肯言者以鹿角屑搗
散水服之

談薈 鹿制於犬



四書經註集証 鹿孕於仲秋生於春其壽長千歲
色蒼又五百歲色白又五百歲色黑食之壽二千歲
埤雅 鹿至六十歲必懷璫於角下角有斑痕紫色
故曰鹿戴玉而角斑

支雅 鹿食菖蒲則肥

清異錄 武宗呼鹿曰茸客

抱朴子 山中卯日稱西王母者鹿也知其名則不
爲害

鯨鹿

譯史紀餘 鯨鹿南海鯨魚所化其色較鹿稍赤

馬鹿

爾雅翼

荆楚有鹿似馬當解角時與馬無異人呼

馬鹿

駝鹿

卑雅

北狄有駝鹿極大而色蒼尻黃無斑角有文

堅瑩如玉茸亦可用

赤鹿

寰中記

南山有赤鹿足短而身大如牛肉千斤

天鹿

瑞應圖

天鹿神獸也狀如牛身披五色而肉甲。

旭按天鹿或作天祿孟康西域傳註云符拔一角爲天鹿兩角爲辟邪狀似虎正黃色有髯尾有茸毛大如斗

靈鹿

粵述 梧州火山產靈鹿三足

兩頭鹿

南中志 兩頭鹿產雲南一身兩頭食毒草又名食毒鹿。旭按兩頭鹿博物志名荼苴机或又名荼苴又名蔡余義段成式雜俎云夷人名其矢爲耶希

飛骸獸

洞冥記 翁韓國獻飛骸獸似鹿青色帝以寒青之
絲爲繩繫之及死挂於苑門皮毛皆朽而骨猶青人
知其神異更以他繩繫其足明日往視唯繫處存餘
皆飛去

把雜爾

坤輿外紀 渤泥產把雜爾狀似鹿腹生一石可療
百病國王甚重之。旭按把雜爾八紘譯史作把雜
蘭出西南大海中渤泥國

櫻如

西山經 臯塗山有獸曰櫻如狀如鹿而四角白尾

其前足如人手而後足如馬蹄

夫諸

中山經 敖岸山有獸曰夫諸狀如白鹿而四角

無損

駢雅 豕頭而牙爲無損 訓纂南方有獸似鹿而
豕頭有牙善依人求五穀食之名無損

角端

廣輿記 角端產韃靼角可爲弓

隴蜀餘聞 角端產瓦屋山能食虎豹不傷人

談薈 角端鹿形馬尾獨角角生鼻上日行萬八千

里能曉四夷之語聖人在位則至
俞樓雜纂 張尙瑗石里雜識云 國朝崇德二年
蒙古貢齊希特能解人語蓋角端之屬然則元時所
見或亦齊希特乎。旭按元太祖至西印度見角端
能言詳元史

麋

博物志 麋生南方恒千百爲羣食澤草其踐處成
泥名曰麋畷種稻可收百倍。旭按此卽今之沙鹿
也狀與鹿無異但目下有兩孔能夜視其毛帶青黑
色牡者亦有兩角夏至角解

淮南子 孕婦見麋而子四目

支雅 山中卯日稱東王父者麋也

羆

北山經 倫山有獸曰羆狀似麋而竅在尾上。旭
按此與上熊屬之羆異

𧢲胡

東山經 尸胡山有獸曰𧢲胡狀如麋而魚目鳴自
呼

麋

西北域記 麋似麋而大前昂後低毛多而長爲裘

甚煖角扁而厚爲決甚良

麀

駢雅 荒鹿麀也

西域記 撻拉巴哈台多麀人呼四不像

廣輿記 麀產陝西終南山

六書故 麀似鹿而大尾可爲拂辟麀

續博物志 麀尾掃羶羶不蠹

恭錄

純廟聖製文集麀角解說壬午爲鹿角

記旣辨明鹿與麀皆解角於夏不於冬然月令旣有其言而未究其故常耿耿焉昨過冬至陡憶南苑有

所謂麋者或解角於冬亦未可知遣人視之則正值其候有已落地者有尙在剗骨或雙或落其一者持其已解者以歸乃爽然自失曰天下之理不易窮而物不易格有如是乎使不悉麋之解角於冬將謂月令遂誤而不知吾之誤更有甚於月令者矣然則月令遂不誤乎曰月令之誤誤在以麋爲麋而不在冬之有解角之獸也蓋鹿之與麋北人能辨之而南人則有所勿能麋之與麋亦如是而已耳且說文訓麋有麋屬之言而名苑則又曰鹿大者曰麋羣鹿隨之視尾所轉而往夫鹿也麋也麋也迥然不同亦不相

其羣而處實今人所知者而古人乃不悉其孰爲鹿孰爲麋孰爲麀則月令不云夏至麋角解冬至鹿角解爲幸矣而又何怪乎其誤麀爲麋也耶旣釋此疑因爲說以識之月令古書不必易靈臺時憲則命正訛以示信四海焉

麀

爾雅 麀大麀牛尾一角

正字通 麀狀似鹿但角不歧毛不斑耳爾雅謂牛尾一角誤

麀

說文麋麋也

爾雅正義 楚人謂麋爲麋

六書故 麋之脂黃亦謂黃羊

本草綱目 麋秋冬居山春夏居澤其狀似鹿而小
無角毛黃黑色牡者口外有兩牙甚長俗呼牙麋白
者曰銀麋孟詵曰麋肉八月至十一月可食餘月動
氣

談薈 麋無膽

埤雅 麋性怯飲水見影卽奔

支雅 山中未曰稱赤吏者麋也

方輝

格致鏡原 弦超入泰山見一物似麝而頭似婦人
髮髻簪珥悉具歸告智瓊智瓊曰此方輝也五百年
一見見者必壽後弦超果二百餘歲

麝

本草綱目 麝一名射父俗名香麝陶宏景曰似麋
而小黑色山居食柏葉又啖蛇其香在陰莖前皮內
別有膜袋裹之入春臍內香滿作痛乃以爪剔出覆
以屎溺蘇頌曰麝出陝西益州河東諸路而秦州文
州諸蠻中尤多蘄州光州亦有之其香有三等第一

曰遺香乃麝自剔出者香所聚處草木不生第二曰
臍香乃殺取者第三曰心結香乃麝爲人獸所迫驚
墜而死人得之然後取出者其形如乾血塊

廣輿記 麝出雲南四川湖廣山西等處

物類相感志 麝香置枕中絕惡夢

水麝

酉陽雜俎 天寶中虞人獻水麝臍中皆水以針刺
其臍漚滴水於斗水中用灑衣服其香不竭倍於肉
麝

麝

本草綱目 麕似麝黧色牡者有短角豹腳好食蛇
其皮甚細膩作靴襪辟濕氣一種白者曰銀麕又施
州山中一種紅者曰紅麕寇宗奭曰麕口兩邊亦有
長牙好鬪。旭按麕肉甚細今所在山中有之狀頗
似鹿而大如犬毛赤黑而無斑善騰躍好登山峯又
爾雅云時善藥頴註好登山峯之獸疑亦此類
格物總論 麕聲如擊破鉢

猶

離騷集傳 猶如麕善登木聞人聲則緣木而上未
幾又下下又上

馬

譯史紀餘 馬緬甸呼麥浪

西番譯語 馬西番呼兒答

談薈 馬無膽其額有白毛曰的盧準有白毛曰的
吻乘之凶其耳中有毛及旋毛在腹下者行千里○
旭按二申野錄載萬厯三年西域貢千里馬青驄色
鹿頭鶴頸耳如竹篴不甚肥大而竟日可以千里又
周穆王有八駿李商隱詩云八駿日行三萬里又八
駿穆天子傳以赤驥盜驪白義踰輪山子渠黃華騶
綠耳爲八駿而拾遺記則又以絕地翻羽奔霄超影

踰輝超光騰霧挾翼爲八駿

牛馬經 馬頭爲王欲方目爲相欲明腹爲城郭欲張脊爲將軍欲強鼻穴欲大耳欲相近而前豎小而厚

相馬經 相馬之法先除三羸五驚乃相其餘大頭小頸一羸也弱脊大腹二羸也小頸大蹄三羸也大頭緩耳一驚也長頸不折二驚也短上長下三驚也大骼短脅四驚也淺髀薄髀五驚也

爾雅正義 馬五尺曰駒六尺曰馬七尺曰騊八尺曰駮。旭按廣輿記載天方產八尺馬

本草綱目 馬十二月而生以生西北方者爲上生
東南方者次之其肉有毒不宜多食肝毒尤甚

支雅 馬食粟則足重不能行遠

中華古今注 馬自識其駒非其駒則殺之

抱朴子 山中午日稱三公者馬也知其名則不爲
害

致富全書 馬房忌作於午位

簡效方 馬齧以豬肉同飯自嚼敷之

朝野僉載 馬咬以鞭鞘燒灰墜之良

蓴鄉贅筆 松江地方嘗見馬生一卵大如鷺子

格致鏡原 馬鬼名賜常以晦夜出行狀如炎火

野馬

騏驎 騏驎野馬也

爾雅註 野馬似馬而小出塞外

廣輿記 野馬產陝西及鞏鞏

本草綱目 野馬甘肅遼東皆有之皮可爲裘肉亦可食味與家馬無異但落地不沾沙

仙馬

廣雅 蕩山志 仙馬卽山馬似馬而大長頸多鬃其鬃白如雪遍體黑色能歷險如山羊。旭按此與下

山馬異

海馬

譯史紀餘 蘇門答刺有海馬或曰馬與龍交而生者其骨至堅土中有此骨凡馬不敢過

海語 海馬色赤黃高八九尺逸如飛龍山食而宅海

格致鏡原 海馬骨水火不能毀惟漚以腐糟則爛
山馬

嶺南雜記 山馬似鹿而角彎向後○旭按說文云北海有野馬曰騊駼形似鹿卽此

鳥獸續考 山馬似鹿而差黑眼下復有兩眼日閉
夜開以燭物

水馬

北山經 求如山有水馬其狀如馬而文臂牛尾其
鳴如呼 註漢武帝時渥泮水中有馬以爲靈瑞者
卽此類也

旄馬

山海經圖 旄馬出南海外狀似馬而足有四節垂
毛

龍馬

瑞應圖 龍馬河水之精也其額上有翼旁有垂毛

○旭按洞冥記云脩彌國有馬如龍能藏形於空中
祇聞其聲又神異經云大宛有良馬曰簫梢鬣垂至
膝毛垂至地疑此皆龍馬之類

肉角馬

八紘譯史 哈烈產肉角馬角有肉長數寸解人語
又善舞能與鼓聲相應

果下馬

廣輿記 果下馬產廣東朝鮮駿者雙脊人呼雙脊
馬○旭按雲南產一種小馬如驢卽此類又西域記

載郭罕之馬高二尺

騊蹄

爾雅 騊蹄趼善陞顛 註顛山形似甌上大下小

騊蹄蹄如趼而健上山

騊駼

爾雅 騊駼枝蹄趼善陞顛 註騊駼似馬而牛蹄

吉駟

海內北經 犬戎國有文馬縞身朱鬣目若黃金名

曰吉駟乘之壽千歲。旭按此卽古所謂雞斯之乘

也或名翠黃或名飛黃或名騰黃或名紫黃又談薈

云漢武帝時西王母貢神馬曰吉光其皮爲裘入水
不濡入火不燃亦此類

騊駼

海外北經 北海有獸如馬曰騊駼色青

蛭蛭

海外北經 北海有素獸似馬名蛭蛭

鹿蜀

南山經 柰陽山有獸曰鹿蜀狀如馬而白首文如
虎而赤尾音如謠佩之宜子孫 註佩其皮毛

狢

東軒主人述異記 東海有獸名狻好食龍腦每與
龍鬪口中噴火數丈龍輒不勝明末海甯人曾見之
康熙二十五年平陽縣亦有此物其身長一二丈形
類馬有鱗鬣鬣中俱有火焰

駮

爾雅正義 駮卽王會篇之茲白也

西山經 中曲山有獸曰駮狀如馬白身黑尾一角
虎爪其音如鼓食虎豹。旭按北山經云駮馬似馬
而一角白身牛尾卽此又漢武帝伐大宛得天馬有
角又魏文成帝紀云庫莫奚獻名馬一角狀似麟

騶

爾雅 騶如馬一角不角者騶 註元康八年九真
得一獸大如馬一角角如鹿茸卽此今深山中時有
之亦有無角者。旭按此卽王會篇之雖馬也

臙疏

北山經 帶山有獸曰臙疏狀如馬而一角有錯畜
之辟火

獨角

八紘譯史 天竺有獨角角生額間能解毒其國水
有毒蛇飲其水卽死人獸每日在水次俟此獸來以

角攪水毒解然後敢飲

坤輿外紀 獨角大如馬色黃其角長四五尺作飲器可解百毒然甚銳能觸獅子若悞觸樹木角不能拔出又反爲獅子所害

𦍋𦍋

東山經 𦍋山有獸曰𦍋𦍋狀如馬而四角羊目牛尾音如犍狗見則其國多狡客

孰湖

西山經 崦嵫山有獸曰孰湖狀如馬而人面鳥翼蛇尾好舉人

馬哈獸

八紘譯史 忽魯謨斯產馬哈獸角長過身

驢

初學記 驢一名衛一名漠驪

正字通 驢廣額長頰礫耳修尾毛有褐白黑三色
以午及五更而鳴

本草從新 反胃取驢溺飲之極有效

物類相感志 驢生墮地口中有一物如肉名媚婦
人帶之亦有媚焉

本草綱目 驢肉與荊芥茶食之殺人孕婦食之難

產

韻雅 鼓歎歎驢鳴也

潛確類書 驢生月初者先母行生月中者並母行
生月底者後母行

清異錄 武宗呼驢曰長耳公

野驢

正字通 女直遼東產野驢狀似驢而色駁可食。
加特其即廣志之驢羊也北山經謂之間郭註云間
即羴也狀似驢而歧蹄角似羚羊又名山驢善躍峻

海驢

廣輿記 海驢產山東登州海中其皮爲雨衣水不能入

譯史紀餘 海驢以秋月出島產子其皮應潮潮至則毛起

海語 海驢毛長二寸晴則下垂陰則髦彩整整也其皮爲褥善人御之竟夕安寢不善人御之必驚

黑驢

八紘譯史 吐蕃有黑驢能與虎鬪一蹄而虎卽斃

福祿

一統志 忽魯謨斯有福祿狀似驢而花文可愛

皮樹

通雅 皮樹似驢

騾

本草綱目 騾大於驢健於馬其力在腰其陰有鎖骨不能開故不孳乳其類有五牡驢交馬而生者騾也牡馬交驢而生者爲馱驢牡驢交牛而生者爲馱駟牡牛交驢而生者爲騎驢牡牛交馬而生者爲駝驢今並呼爲騾

八紘譯史 天下騾不孳乳惟阬入多之騾能孳乳
駝騾

洞冥記 元封四年脩彌國獻駁騾高十尺其毛赤而有斑如日月之象

牛

譯史紀餘 牛緬甸呼那

西番譯語 牛西番呼拔浪

世史正綱 虜呼牛爲不花

正字通 牛梵書謂之瞿摩帝其子生望前者行母前生望後者行母後。旭按牛犛牛也俗謂之黃牛周禮謂之太牢曲禮謂之一元大武或說初生時蹄有硬壳當剝去始能行走又說其壳焙研治鬼瘡甚

效又說牛三歲生兩齒四歲四齒五歲六齒六歲八齒全備自後每年接脊骨一節

埤雅 牛耳無竅其聽以鼻其病則耳燥故古之視牛者以耳

酉陽雜俎 牛歧胡有壽角冷有病睫亂觸人數肋難養旋毛在珠泉者天銜鳥角偏者妨主毛少骨多者有力溺向前射者良

攷富全書 牛角細身粗尾長者良凡放牛食草須先令飲水則不致腹脹

牛馬經 牛頭白者名孝頭牛畜之大不祥

談薈 牛食鰓則肥

農書 凡牛有病用藥與人無異其便溺有血是傷於熱也以便血溺血之藥大劑灌之冷結卽鼻乾而不喘以發散藥投之熱結卽鼻汗而喘以解利藥投之脹卽疏通毒卽解散如此何病之足患哉

本草綱目 黑牛白頭及獨肝者自死者肉有毒殺人孟詵曰惡馬食牛肉卽馴

石藥爾雅 牛乳汁名蠡蠕漿

利濟外編 蛇咬取黃牛耳垢敷之良

抱朴子 山中丑日稱書生者牛也知其名則不爲

害

水牛

西番譯語

水牛西番呼初浪

本草綱目

水牛肉宜忌與黃牛同孟詵曰婦人無

乳以水牛鼻作羹食之不過兩日乳下無限

山牛

嶺南雜記

南海有山牛狀似牛而眼紅

本草綱目

山牛鹿角

野牛

槐西雜誌

烏魯木齊多野牛似常牛而高大千百

爲羣角利如矛稍其行以弱者居後强者居前若自
前擊之則馳突奮觸銳礮不能禦自後擊之則不反
顧中推一巨者爲首眾隨之行常有一爲首者失足
落深澗中羣牛俱投入殪焉。旭按八紘譯史云占
城有野牛見衣青者必觸而死未識卽此否

海牛

本草綱目 海牛寔字志謂之潛牛廣志謂之牝牛
出登州海島中牛身鼉腳其皮可供百用捕者入水
以杖擊其鼻則得之

赤雅 東粵曰潛牛西粵曰潛州留楚曰鰐鰓

水經注 潛牛似水牛好上岸鬪角軟還入水中角
堅復出。旭按此牛能與虎鬪

神牛

博物志 九真有神牛生谿山上出時共鬪卽海沸若
岸上鬪牛皆驚怖人或遮則霹靂

麒麟

廣志 麒麟似鹿肉美皮甚溫煖常處滇濱

駝牛

事物紺珠 駝牛皮如豹而蹄似牛長九尺高丈許
出西域

犂牛

正字通 犂牛牯牛也爾雅名犛牛穆天子傳名物
牛○旭按穆天子傳有牻牛無物牛字典牻字註引
集韻云音方又引穆天子傳云牻牛二百以行流沙
而正字通牻字註云僞字想誤以牻字爲物字之僞
故書牻牛爲物牛耳又郭氏爾雅註言此牛領上有
肉墳起高二尺許狀如駝峯然則紀文達公所謂野
駝單峯蓋卽此

廣輿記 犛牛產廣東雷州府海康縣

牻牛

本草綱目 牦牛牦牛也出甘肅臨洮及西南徼外其狀如水牛體長多力髀膝胡背毛黑色長尺餘尾大如斗甚自愛護草木鈎之則止而不動人取以爲纓帽其雜白色者以茜染紅色用之肉味美

廣輿記 牦牛產西番及雲南永甯府

字典 顏師古以牦牛爲犏牛誤

犏牛

西番譯語 犏牛西番呼毋作

廣輿記 犏牛產四川陝西甘肅等處

水東日記 牦牛與犏牛合生犏牛其狀亦類牦牛

犛牛

本草綱目 犛牛卽廣志之毛犀漢書註之貓牛爾雅之摩牛山海經之牝牛也西人呼竹牛又音轉爲犛牛丹鉛錄云卽豕也出西南徼外狀及毛尾俱同牦牛但牦小而犛大肉數千斤毛黑色尾亦可爲纓帽昨夢錄云其角甚長而黃黑相間製弓極勁格古論云其角花斑類山犀而無粟文其理似竹

赤犛 豕耳濺濺其大如掌行動鼓舞日常帶笑有歡悅發揚之意其狀似犀而角小產兩粵東曰茅犀西曰豬神遇之吉

犁牛

爾雅 犁牛

註犍牛也如牛而大肉數千斤出蜀

中

犍牛

廣志 犍牛出日南及潯州大賓縣毛青黃色與蛇同穴性嗜鹽人裹手塗鹽取之角如玉可爲器○旭按卽糖牛也今廣西有之

犍牛

爾雅正義 犍牛卽每牛也又呼犍牛又呼果下牛產廣東高州府○旭按西域記云郭罕之牛高二尺

卽此類又王漁洋精華錄自註云西洋小白牛質白有斑文長二尺高一尺七寸項有肉峯

青牛

廣輿記 兀良哈產青牛。旭按拾遺記載魏文帝有青色之牛足如馬蹄日行三百里或卽此又搜神記云百年樹精化青牛

犁牛

山海經註 犁牛文如虎。九按犁牛卽留牛也東山經謂之輪輪狀如牛文如虎見則大水

花蹄牛

續博物志 元封二年大秦國貢花蹄牛高六尺四耳尾環繞其角

洞冥記 元封中有花蹄牛色駁蹄如蓮花善走多力帝使輦銅鐵起望仙宮迹踐石上皆如花形

白皮牛

元中記 大月氏有白皮牛今日割取肉三四觔明日視之如未割然。旭按白皮或作白及或作日及又唐書云天竺有稍割牛角細而黑長四尺許其肉須十日一割不割則死人得其血飲之壽可五百歲卽此類也

茲白牛

逸周書 大夏茲白牛 註大夏西北戎茲白牛野獸。旭按茲白牛王會篇註祇云野獸而廣廣事類賦註引王會篇註云茲白牛野獸也牛形象齒長角牛

八紘譯史 扶桑有長角牛以角載物勝二十斛罷達

八紘譯史 天竺有罷達形如牛身似象兩角一在頂一在鼻其皮如鎧甲刀箭不能傷居水中可數十日畜之可以馭百獸。旭按坤輿外紀言此獸骨肉

皮角牙糞皆可爲藥西洋人甚重之

那父

北山經 灌題山有獸曰那父狀如牛而白尾音如
談

犖

西山經 黃山有獸曰犖狀如牛而大目毛蒼黑色

蜚

東山經 大山有獸曰蜚狀如牛而白首一目蛇尾
行水則竭行草則枯見則天下大疫

頡胡

北山經 陽山有獸曰頡胡狀如牛而赤尾其頸鬣其鳴自諂食之已狂

犀渠

中山經 釐山有獸曰犀渠狀如牛而色蒼音如嬰兒是食人

精精

東山經 踰隅山有獸曰精精狀如牛而馬尾鳴自諂

窮奇

西山經 邽山有獸曰窮奇狀如牛而蝟毛音如獬

狗是食人 註或云窮奇似虎蝟毛有翼一名神狗
神異經 窮奇知人言聞人鬪則食直者聞人忠信
則食其鼻聞人惡逆則殺獸饋之

獬豸

西山經 三危山有獸曰獬豸狀如牛而白身四角
其毫如披髮是食人

諸懷

北山經 北嶽山有獸曰諸懷狀如牛而四角人目
豕耳其音如鳴雁是食人

夔

大荒東經 流波山有獸曰夔其狀如牛蒼身無角
一足出入水則必風雨其光如日月其聲如雷黃帝
得之以其皮爲鼓橛以雷獸之骨聲聞五百里 註
雷獸雷神也

獬

北山經 乾山有獸曰獬狀如牛而三足鳴自談

窳

北山經 少咸山有獸曰窳窳狀如牛而赤身人面
馬足音如嬰兒是食人

狍

雲門子 寒山有獸其名曰貆其角當心俯而磨之
憤心而死

撒刺漫大辣

坤輿外紀 熱爾馬尼亞產撒刺漫大辣其毛黑黃
間雜至尾有斑點皮甚厚力能滅火

羊

周禮 羊曰少牢

曲禮 羊曰柔毛

古今注 羊一名髯鬚主簿又名髯鬚參軍

述異記 羊一名胡髯郎

文選註 中牟羊也

事物紺珠 羊一名白石道人

庶物異名疏 羊一名卷婁

譯史紀餘 羊緬甸呼赤

西番譯語 羊西番呼路

談薈 羊一歲而三生其生江南以東者多白生江南以西者多黑其脂可柔銀其頭骨燒灰能消鐵。旭按羊吳羊也頭身相等今處處有之產湖州者毛細而長可爲筆

格致鏡原 羊目無睛

致富全書 羊以正月十二月生者爲佳

留青日札 羊哀在腸其形如小鼠子得之可治鬲食翻胃。旭按或說此物色白如玉形類狗寶

本草綱目 羊肉性溫無毒然能發病其黑羊白頭白羊黑頭及獨角者有毒宜忌。旭按獨角曰蛟羊殺人

利濟外編 誤吞金銀以羊脰骨燒灰服之卽下

醵贍 有人宰羊肚中得珠盈掬圓大如豌豆一老人云羊食仙草或雷雨時與龍交則生珠

抱朴子 山中未日稱主人者羊也知其名則不爲

害

夏羊

本草綱目 夏羊綿羊也生秦晉間其頭小而身大毛長土人二歲一剪其毛以爲氊

水羊

八紘譯史 占城多水羊

羴羊

廣輿記 陝西甘肅鞏岷產羴羊。旭按此卽俗所謂山羊也或說大者如驢毛灰白色其角長而灣上面有節文人取以爲鞍橋牝者曰羴羊角畧小並以

時墮角

塞北小鈔 塞外產盤羊鹿身細尾兩角盤背上有
蹙文依爾雅本草諸說考之蓋卽羴羊也

槐西雜誌 羴羊肉與常羊無異

粵西偶記 取雞血半杯投山羊血米許過宿卽化
爲水否則僞充

正字通 羴羊角若沾土暑天露浥之則生草其上
甚自愛護

羴羊

廣輿記 羴羊產四川陝西湖廣及安南等處。旭

按羚羊與羴羊相似但羚羊角短而羴羊角長羚羊角兩面有節而羴羊角祇一面有節又本草云阿丹國有羚羊自胸至尾垂九塊又名九尾羊又云安南出一角羚羊其角能碎金剛石及獬骨又正字通云閩廣山中有野羊彼人亦呼羚羊

爾雅正義 羚羊夜宿以角掛樹不着地

乳羊

坤輿外紀 南印度產乳羊頂生兩乳下垂乳甚肥壯○旭按桂海虞衡志云乳羊出英州其地多仙草羊食之舉體悉化爲肪不復有血肉食之宜人疑此

乃別一種乳羊

莧羊

本草綱目 莧羊似山羊而角甚細

豪羊

穆天子傳註 豪羊似牦牛

綿羊

桂海虞衡志 綿羊出邕州溪洞及諸蠻國與朔方

胡羊不異。旭按此與上綿羊異

玉羊

瑞應圖 王者律呂調和則玉羊見。旭按南越志

云尉佗時有五色羊以爲瑞因圖之府廳卽此類
墳羊

本草綱目 墳羊土之精也其肝皆土。旭按季桓
子穿井嘗得此羊說詳國語又千年樹精亦化青羊
紅羊

潛確類書 北方有紅羊爲世珍味

黃羊

爾雅正義 羊之腹下黃色者名羴羊後世所謂黃
羊也狀如羊而庫小細筋纖耳角似羖羊生野草間
而善羣又有尾黑者又有尾似麋鹿者又有黑脊白

斑者皆其別種也。○旭按黃羊一名蜚耳羊出關西
西番及桂林諸處其尾黑者名黑尾黃羊出沙漠地
善走其尾似麋鹿者名洮羊甚大出臨洮皮皆可爲
衾褥其黑脊白斑者出桂林狀頗似鹿以上俱見本
草又坤輿外紀云利未亞產異羊一尾重十斤味至
美或亦此類又西域記云郭罕之羊高八九寸長一
尺則較黃羊而尤小矣

羝羊

西山經 錢來山有羝羊狀如羊而馬尾 註今大
月氏有大羊如驢馬尾卽此此卽爾雅高六尺之羝

也

龍羊

格致鏡原 龍羊出吐蕃形似羊而大其角繚上重八九兩黑質而白文以爲帶胯可亂犀角

鬬羊

瀛涯勝覽 忽魯謨斯產鬬羊高二尺七八寸前截毛長拖地後截皆剪淨頗似綿羊角彎向前性好鬬人畜之賭博爲戲

𦍋羊

逸周書 高夷𦍋羊𦍋羊者羊而四角。旭按西山

經云土螻似羊而四角食人卽此又金史載熙宗七年有三角羊又後漢書載蜀復山郡有五角羊又述異記載周成王時有六角羊

封羊

廣輿記 封羊產陝西鳳翔府。旭按卽駝羊也背有肉如駝羣

羣羊

本草綱目 羣羊出西北地其蹄皮可以割黍

胡羊

事林廣記 大食勿斯離產胡羊高三尺其尾大如

扇土人每歲正月割取其脂二十餘斤仍縫合之不取則脹死

野羊

西域記 回地有野羊大如驢青白色毛長被體其面似人形頰下有鬚長六七寸亦類人之落腮鬚回人謂其神靈不敢殺也。旭按西域記又言巴喇哈有獨角野羊又尤侗竹枝詞載小葛蘭有羊青色腳高二尺許

壠種羊

西域記 壠種羊出西海以羊臍種土中聞雷而生

臍系地及長驚以木聲斷臍而行。旭按此卽地生羊也。或謂之骨種羊。以羊骨一具埋土中。次年可得子羊數隻。

野青羊

酉陽雜俎 罽賓國有野青羊。尾翠色。土人食之。

大頭羊

西域記 回地有大頭羊。角長而盤。生肉甚粗劣。皮則溫煖。

大尾羊

廣輿記 忽魯謨斯及撒馬兒罕出大尾羊。旭按

此卽唐書之靈羊也其尾重一二十斤可療毒見本草

羴

南山經 洵山有獸曰羴狀如羊而無口不可殺也
獬薦

西藏記 西藏產獬薦羊身獨角。旭按卽獬豸也
一統志謂之抵詭獸神異經謂之任法獸其性忠直
能觸奸邪又王充論衡云臯陶治獄其罪疑者令獬
豸觸之據此則虞廷士師何人不可爲焉用臯陶且
疑罪既可決於獬豸則臯陶時宜無疑罪矣何以大

禹謨又曰罪疑惟輕乎

辣辣

北山經 泰戲山有獸曰辣辣狀如羊而一角一目
目在耳後

葱萐

山海經圖 葱萐似羊而赤鬣出符禺山

獬廌

山海經圖 獬廌似羊九尾四耳其目在背出基山

饕餮

北山經 鈎吾山有獸曰狍鴝狀如羊而人面虎齒

人爪其目在腋下其音如嬰兒食人 註卽饕餮也
天祿識餘 饕餮龍子性好食故立於鼎

驪

北山經 歸山有獸曰驪狀如羚羊而四角馬尾有
距善旋 註旋言旋舞也

犬

中華古今注 犬一名黃羊又名羹獻

事物紺珠 犬一名義畜又名家獸

本草綱目 犬齊人呼地羊

西番譯語 犬西番呼氣

正字通 犬乃狗之通稱或說大曰犬小曰狗泥

淮南子 犬孕三月而生

支雅 犬食木驚子則死

續博物志 白犬辟邪

埤雅 犬喜雪

清異錄 武宗呼犬曰守門使

抱朴子 山中戌日稱人姓氏者犬也知其名則不

爲害

靈應錄 犬不食其類

急救方 凡犬頸硬頭低耳落尾躡直向前行不能

返身顧後闖入人家不拘生熟卽亂齧者此癩犬也
春夏曰桃花癩秋冬曰梅花癩人若中其毒重則七
日輕則七七日定當發作不急治必死惟初齧時急
就無風處以冷水洗淨隨服韭菜汁一碗七日又一
碗至四十九日共服七碗始可無慮然百日内當忌
鹹酸一年內忌魚腥終身忌狗肉蠶蛹否則必發

鼯犬

逸周書 渠叟以鼯犬鼯犬者露犬也能飛食虎豹
○旭按匈奴有狡犬亦此類

蠻犬

桂海虞衡志 蠻犬如獵狗警而獒。旭按此疑卽爾雅之贊也似狗曠惡多力又八紘譯史云意大理亞有犬能戰一犬可當一騎亦此類又贊字或書作贊誤

鬱林犬

桂海虞衡志 鬱林犬出鬱林州形極高大垂耳拳尾與常犬異

犴

集韻 犴北方獸名似犬食人。旭按此與上馬屬之犴異

禍斗

太平廣記 禍斗似犬食火糞復爲火能燒人屋

草上飛

八紘譯史 吐番有草上飛形似犬色如玳瑁獅子

虎豹皆畏之

貔貅

隴蜀餘聞 峩峩山產貔貅形類犬黃質白章甚遲

鈍羣犬好侮之其聲似念陀佛

侈卽

中山經 鮮山有獸曰侈卽狀如膜犬而赤目赤喙

白尾見則有火。旭接膜犬犬之獵毛多力者

渾沌

神異經 崑崙西有獸狀如犬長毛四足似熊而無
爪兩目不見兩耳不聞有腹而無五臟經過者有德
行則抵觸之有凶德則依據之名曰渾沌

獐

中山經 依軫山有獸曰獐狀如犬而虎爪有甲食
之不風 註甲獐也不風不畏風也

獺

中山經 釐山有獸曰獺狀如犬而有鱗毛如豕鬣

狡

西山經 玉山有獸曰狡狀如犬而豹文牛角鳴如
犬吠見則其國大穰

縱縱

東山經 恂狀山有獸曰縱縱狀如犬而六足鳴自
諂

山獬

北山經 獄法山有獸曰山獬狀如犬而人面見人
則笑其行如風

天馬

北山經 馬成山有天馬狀如白犬而黑頭有翼見人則飛

馬見愁

天祿識餘 西域有獸如犬含水嚙馬目則馬瞑眩欲死故馬皆畏之名曰馬見愁其皮編爲馬鞭一揚卽走謂之不須鞭

碧芬

明皇雜錄 太宗時林氏國貢碧芬之裘碧芬者騶虞與豹交而生大如犬碧如黛香聞數十里彼國人名鮮渠上沮

海狗

譯史紀餘 海狗似狗而小魚尾毛黃色一雄百雌
徧偶不倦其腎卽溫腴臍冬月置水中水不凍
談薈 溫腴臍駭犬

田狗

廣雁蕩山志 田狗似狗而小毛深溫厚○旭按此
卽吾鄉之倒田狗也狀似狗而庫小喙尖毛黃黑色
竹狗

廣雁蕩山志 竹狗似狗而大尾有毳善走毛亦如
田狗而色鮮麗○旭按竹狗皮似狐但質稍重

木狗

本草綱目 木狗形如黑狗善登木產廣東左右江
山中其皮爲裘褥能運動血氣

鷹背狗

輟耕錄 鷗生三卵其一爲狗其狀與狗無異但自
背至尾有羽毛數莖田獵之際隨母影而走所逐無
不獲者名鷹背狗

般第狗

坤輿外紀 意大理亞產般第狗色不一晝潛於水
夜卧陸地能嚙樹木其利如刀

佛菰狗

八紘譯史 唐武德時高昌獻佛菰狗高六寸長尺餘其性甚慧。旭按今市中一種洋狗高數寸長尺餘能人立又能如人揖狀卽此又嶺南雜記云西洋狗小者最貴有黑者有黃者又有一種稍大而尾長尺許深目短喙狀如獅子者

西番狗

東軒主人述異記 西番狗形質稍高于常狗而前兩足指長如猴足作活與人無異命之掃地卽奉帚至庭下掃除甚潔雖磚石中草根亦以爪剔淨掃畢

奉箒跪復命于主人之前又可命之燒火屈薪爲把
進火如人樹枝長者則以刀折之饌旣熟擊竈數下
卽止火矣其他雜役亦過於人若與之肉拜而後食
食畢復稽首三四焉

蠅

酉陽雜俎 蠅似黃狗其圍有常處若行遠不及家
則以草塞其尻

谿邊

西山經 天帝山有獸曰谿邊狀如狗卧其皮者不
蠱

彭侯

白澤圖 彭侯木之精也似黑狗而無尾。旭按搜神記載彭侯狗身人面肉可食其味如狗肉又或說木之精曰賈胍狀如豕

畢

南華經音義 畢狀如狗而有角文身五采

狗獾

本草綱目 狗獾蜀人名天狗其狀似狗而小尖喙足與尾並短毛黃褐色皮可爲裘。旭按一種尾長者名獾

海獾

本草綱目 遼東女直有海獾皮亦可爲裘

豺

爾雅正義 豺善搏噬羣行虎亦畏之。旭按卽豺狗也狀似狗而瘦尾長毛黃褐色其鳴如狗吠或說獵人誤擊之多不祥

狼

本草綱目 狼南人呼毛狗狀似狗而後足短銳首白頰尖喙駢脊毛黃黑色亦有蒼灰色者北方最多其腸直鳴則後竅皆沸其聲如兒啼

西番譯語 狼西番呼思變谷

埤雅 狼老則項下有胡

酉陽雜俎 狼糞烟直上風吹之不斜故烽火用之
白澤圖 狼百歲化美女名曰知丈夫娶之食人惟
呼其名則逃去

談薈 浙江無狼

字典 狼將遠覓食必先倒立以下所向

抱朴子 山中寅日稱當路君者狼也知其名則不
爲害

豺狼

西域記 豺狼生回地山中高尺餘長三尺形全似
狼百十爲羣遇野牲則羣起噬之無得脫者人或於
山岩幽隱處以鳥鎗擊殺一二彼必羣聚零星分散
銜之而去不使人得其骸骨。旭按郡國志載紹慶
府多野狼眼生背上能食諸獸或卽此類

麋狼

駢雅訓纂 麋狼似鹿而角生向前入林恐樹掛角
故恒在平淺草中其肉肥美皮可作履襪

地狼

正字通 地中有犬名曰地狼。旭按地中犬青

色見集異志

狔狼

中山經 蛇山有獸曰狔狼狀如狐而長耳白尾見
則有兵

狔

本草綱目 狔似狼而前足短駕狼而行

狔

正字通 狔似狼善驅羊。旭按或說狔卽狔澤西
陽雜俎云狔澤大如犬其膏宣利以手及銅鐵瓦器
貯之皆透惟以骨貯之則不透

獨狙

東山經 北號山有獸曰獨狙狀如狼而赤首鼠目
音如豕是食人

獲落

坤輿外紀 里多瓦你亞產獲落形似狼毛黑有光
彩皮甚珍貴好食死屍若食飽必入稠密樹林夾其
腹令空又覓他屍。旭按此卽八紘譯史所謂大布
獸也狀似狼而人手足

意夜納

坤輿外紀 利未亞產意夜納形似狼目睛能變各

色夜能學人聲誘人食之

豕

曲禮 豕曰剛鬣。旭按豕今通稱爲豬或以牝牡
大小別之泥

古今注 豕一名參軍

承平舊纂 黑面郎豬也又名魯津伯

西番譯語 豕西番呼怕

本草綱目 豕生青兗徐淮者耳大生江南者耳小
生燕冀者皮厚生雍梁者足卑生遼東者頭白生豫
州者味短生嶺南者肥大

嶺南雜記 豬出南雄府者耳小腳卑爪細重一二
十斤皮薄肉嫩與常豬不同廣人甚貴之又出江西
贛州龍南縣

頤生論 豬無筋

孔子家語 豕四月而生

埤雅 豕喜雨

致富全書 桐花飼豬肥大三倍如病但割去尾尖
出血卽愈若瘡疫以蘿蔔飼之

簡效方 豬齧以龜版燒灰麻油調敷

本草備要 豬肉忌黃連烏梅桔梗犯之下痢

抱朴子 山中亥日稱神君者來也知其名則不爲害

野豬

槐西雜志 烏魯木齊多野豬猛鷲亞於野牛毛革至堅鎗矢不能入其牙利如刃馬足觸之皆中斷。旭按野豬處處有之狀似豬毛褐色口外有兩牙甚長食蛇大者重三四百斤能與人鬪

本草綱目 野豬齒燒灰水服治蛇咬

豪豬

爾雅正義 豪豬一名猓又名希

本草綱目 蒿豬山豬鸞豬狙豬獬獬皆豪豬之別
名其狀似豬而項脊有棘鬣長尺許粗如箸白本黑
端怒則能激射人今處處有之害田稼肉有毒

倦游錄 南海泡魚大如斗身有棘刺老則化豪豬
豬獬

正字通 豬獬一名獬狔。旭按此卽爾雅之獬也
狀類狗獬頭似豬毛黃褐色脊上有黑毛一道蒸食
極美

獬婦

桂海虞衡志 獬婦似山豬而小害田稼惟以織具

置田中則不敢近

倉唐

白澤圖 倉唐金之精也狀如豕居人家使人不宜妻。旭按或說地中有豬名邪卽此類與

穰

正字通 崑崙有獸曰穰其狀如豕而兩目在耳

猧猧

東山經 泰山有獸曰猧猧狀如豕而有珠鳴自談。旭按拾遺記載禹鑿龍門見一獸如豕銜夜明之珠其光如燭卽猧猧之類與

當康

東山經 欽山有獸曰當康狀如豕而長牙鳴自談
見則天下大穰

狸力

南山經 柜山有獸曰狸力狀如豕而有距鳴如犬
吠

閭璘

中山經 凡山有獸曰閭璘狀如豕而白首白尾黃
身見則有風

山膏

中山經 苦山有獸曰山膏狀如豕而赤如丹火善
晉

駭神

異物志 建州蒲城縣有獸曰駭神狀如豕人首貌
甚凶惡百鬼皆畏之張平子往圖其形此獸入水中
不出或云彼畏圖寫故不出平子遂去紙筆果躍出
石上乃潛以足指畫之今號巴獸潭

合窾

東山經 剡山有獸曰合窾狀如豕而人面黃身赤
尾音如嬰兒是食人

蠶蜥

中山經 昆吾山有獸曰蠶蜥狀如豕而有角音如人號食之不昧

猾褊

南山經 堯光山有獸曰猾褊狀如人而豕鬣音如斲木

孟槐

北山經 譙明山有獸曰孟槐狀似狙豬而赤豪可以禦凶

鼈封

逸周書 鼈封似豕而前後有頭。旭按大荒南經云有三青獸相并名曰雙雙又云跽踖左右有首又唐書載神功元年安國獻兩首犬皆此類

猩猩

廣輿記 猩猩產廣西雲南及安南等處。旭按猩猩狀如猿而毛黃耳如豕而色白面與足如人聲如兒啼亦有如犬吠者其性最機警通八方言學蟲鳥語無不曲肖音如二八女子其行如人性嗜酒與屐捕者以美酒相連屐置山中誘之猩猩始見則知誘者姓名呼而冒曰此誘我也遂去旣而復來染指於

酒而嘗之着屐而試之已而又去去又復來乃相與
飲酒着屐人見其醉不能行乃獲之間其血幾何若
少應則鞭撻使增至斗許然後殺之所得血如
所言之數其肉食之可以辟穀唇尤美爲八珍之一
以上集眾說

淮南子 猩猩知往而不知來

雲嶠類要 談苑云宋太祖平嶺南得猩猩如雄鴨
而大取其血染色如渥丹與今傳記所載不同

格

述異記 南康郡有獸曰格似猩猩而自知吉凶人

善撫之則可馴若欲害之則去

狒狒

廣輿記 狒狒產安南。旭按此卽逸周書之吐嘯
山海經之臯羊述異記之山都也或又呼髣髴西蜀
及處州山中呼人熊閩中呼野人又呼山大人其身
長丈餘人面紅赤色長唇黃髮髮與身等無膝反踵
手足如人毛似猴色黑力大能負千斤又能言音如
鳥食人然見人必先執手而笑笑則唇掩其目捕者
多以竹筒貫臂誘之俟其執筒仰天而笑急以筒鑿
其唇而仆之其血堪染緋飲之能使人見鬼以上集

眾說

磔磔

駢雅訓纂 西方有獸長短如人羊頭猴尾名曰磔

磔

野婆

彙苑 南丹州有獸曰野婆狀如婦人黃髮堆髻裸形跣足其類無牡遇男子必負去求合嘗爲健夫所得殺之至死以手護腰剖之有印方寸瑩若蒼玉上有符篆人不能識。旭按唐蒙博物志云日南有野女羣行覓夫卽此又名黃丹

齊東野語 野婆喜盜人家子女然畏人罵者其家
大罵不已仍挾而還之

魍

神異經 南方有魍一名旱母狀似人目在頂上裸
形疾走見則大旱惟投之溷中則旱除

文字指歸 女魍入人家則竊物以出男魍入人家
則竊物以歸。旭按今俗有五通神入人家淫人婦
女往往其家財帛無故自至亦此類也

刑天

東華錄

刑天目在乳旁口在臍旁蒙古名其獸爲

鄂布又有飛者名爲積布。旭按紀文達公筆記云昔科爾沁台吉達爾瑪達都嘗獵於漠北深山遇一鹿負箭而奔因引弧殪之方欲收取忽一騎至鞍上一人無首目在兩乳口在臍語自臍出雖不可辨然觀其手所指畫似言不應奪其所射鹿時台吉亦指畫示以物當均分其人首肯遂剖爲二持半鹿而去此卽所謂刑天也據此兩說則刑天乃山都野婆之類而山海經以爲神何哉

蝸蝓

正字通 蝸蝓似三歲小兒黑色赤目長耳美髮。

旭按蜎蜎周禮作方良左傳作罔兩國語作罔象史記作罔閬六書正譌作蜎蜎白澤圖曰水之精也火之精曰鸛鳩詳羽蟲鶴屬土之精曰墳羊木之精曰彭侯金之精曰倉唐俱詳於上他如玉之精曰岱委狀如美女衣青衣刺以桃棘則不能遁門之精曰野狀如侏儒見人則拜呼之宜飲食故臺屋之精名兩貴狀如赤狗呼之使人目明故水石之精名慶忌狀如人乘車蓋一馳千里呼之可使入水取魚故廢墓之精名元狀如老役夫操杵好春呼之使人宜禾穀故徑之精名忌狀如野人喜行歌呼之不迷故道之

精名作器狀如丈夫善眩人故池之精名意狀如麻
故并故淵之精名觀狀如美女好吹簫故室之精名
係龍狀如小兒黑衣赤幘呼其名則去故牧廢池之
精名髡頓狀如牛好逐人故丘墓之精名狼鬼善與
人鬪當脫履捉之則得故溷之精名卑狀如美女持
鏡呼之則愧而去此皆蜎蝓之類故附誌焉

本草綱目 秦時陳倉人得一獸若豕若羊路逢二
童子曰此名犢弗述又名蜎專在地中食死人腦但
以柏挿其首則死此卽蜎蝓也

視肉

海外南經註 視肉獸名形似牛肝有兩目食之無
盡

蠱雕

南山經 鹿吳山有獸曰蠱雕狀如雕而有角音如
嬰兒

文文

中山經 放臯山有獸曰文文狀如蜂而歧尾反舌
善呼

援

古今注 援一名參軍

廣輿記 猿產四川白面者產雲南○旭按廣雁蕩山志載石門山產狢似猿色綠然狢卽猿字蓋綠色之猿耳並非另有一種狢也

南山經注 猿似猴而大長臂善啼其聲淒切入人肺腑

桂海虞衡志 猿有三種金絲者黃玉面者黑純黑者面亦黑金絲玉面皆難得或云純黑者牡金絲者牝又云牡者能嘯牝者不能其性畏着地着地卽泄瀉而死惟煎附子汁飲之可愈

正字通 牡猿爲人所得牝亦從之必不獨生其性

好攀援飲水必自高處纍纍相接而下故曰猿孕五月而生

酉陽雜俎 猿臂骨作笛其聲圓如竹

字典 以鼠繫猿頸猿不敢動

埤雅 猿鳴而獼猴之故東哲曰獼以猿爲婦

抱朴子 猿五百歲化獲千歲化老人

支雅 山中申日稱九卿者猿也

獼獼

正字通 獼獼猿屬黑身白腰如帶手有長毛白色如握服之狀

獨

本草綱目 獨似猿而大食猿與猴。旭按今山中
有物似獼猴而畧小首與尾皆黑色俗名兩頭烏好
食獼猴卽此

朱厭

西山經 小次山有獸曰朱厭狀似猿而白首赤足
見則有兵

雍和

中山經 豐山有獸曰雍和狀似猿而赤目赤喙黃
身見則國有大恐

猱

埤雅 猱一名猱

談苑 猱類猿尾長作金色俗名金線猱川峽深山中有之人多以藥箭射殺取其皮爲卧褥鞍被之用其尾甚自愛然中毒則嚙斷擲之惡其爲身患也

玉堂閒話 猱之雄者其毫長一尺今大官取爲暖座

嶺南雜記 猱食猴凡猴見猱不敢動猱取其肥大者以石戴其頂餘俱散去其戴石者隨猱至水次洗濯又自拔毛淨乃仰卧聽猱食

果然

本草綱目 果然南人名仙猴出西南諸山中狀似
猿白面黑頰多髯毛采斑斕尾長於身末有兩歧兩
則以歧塞鼻喜羣行老者前少者後食相讓居相愛
生相聚死相赴柳子厚謂仁讓孝慈者此也。旭按
此卽爾雅叩鼻長尾之蝟也郭氏讚云寓屬之才莫
過於蝟兩則自懸塞鼻以尾厥性雖陋列象宗彝
異物志 果然出交州鳴自呼

爾雅翼 果然人得其一則舉羣啼相赴雖殺之不
去

蒙頌

爾雅註 蒙頌蒙貴也狀如雌而小紫黑色捕鼠勝於貓九真曰南出之

廣志 蒙貴有白黃黑三色暹羅國最多

猴

正字通 猴狀如人頰陷尻無毛尾短聲嗚嗚若茲腹無脾以行消食孕五月而生生子浴澗中性躁動害物畜者使坐杖上鞭撻旬月乃馴梵書呼摩斯咤○旭按猴莊子謂之狙柳宗元謂之王孫格古論謂之胡孫史記謂之沐猴言其好拭面如沐也本草謂

之獼猴倦游錄云馬廐畜猴避馬病故胡人又謂之
馬留今處處有人畜之又名葛牂俗名猴孫又名獼
孫牝者信水亦月一至又廣輿記云百花產一種紅
猴

西番譯語 猴西番呼思卜列吾

談薈 猴毛納網四角則多得魚

抱朴子 猴八百歲化猿

清異錄 武宗呼猴曰猩猩奴

支雅 山中申日稱人君者猴也

石猴

蕁鄉贅筆 滇中產石猴大如小兒舉人畜硯旁令磨墨飼以菓實但不飲水。旭按此卽談薈所謂栗子猴也又二申野錄載明弘治十八年崇明縣民家雞生一方卵碎之中有猴大如棗又幽怪錄云伶人刁朝俊妻美而有癭一日癭破內一猴跳出則較雞卵之猴爲尤奇矣

嶺南雜記 廣之高州化州出石猴

狢

漢書楊雄傳註 狢似猴卽鼻長尾

前兒

逸周書 穢人前兕前兕若獼猴立行聲似小兕

厭火

談薈 厭火似猴色黑其火出口中

騰猋

談薈 騰猋似猴而髮長覆面欲有所視則搖頭以手披之。旭按騰猋卽騰遠又名騰豺善緣木

巫支祈

岳瀆經 禹導淮獲巫支祈善言語其形似猴縮鼻高頰青軀白首金目雪牙頸伸百尺力逾九象乃命庚辰繫之淮陸龜山之足淮水乃安。旭按巫當作

無見天祿識餘

獼父

爾雅 獼父善顧 註獼獼也似獼猴而大色蒼黑

能獼持人善顧眄。旭按此卽蜀西界中之猴獼也

一名獼獼又名化其狀似猴長七尺能人行其類無

牝遇婦女必獼去終身不得還十年之後人亦迷惑

不思家及有子乃俱送歸其子孫多姓楊見博物志

獼

神異經 西方有獸面目手足毛色如猴體大如驢

善緣木純雌無雄名獼居要路強男子交合十月生

康

康

爾雅註 建平山中有康大如狗似獼猴黃黑色多
髯鬣好鬻迅其頭能舉石擲人獼類也。旭按此卽
西山經之舉父也又名髯長臂善投

狢

正字通 狢出暹羅之峒隴短小精悍目圓睛黃木
食如猿獒獠人畜之蒙以敝絮飲以醕酒食以鯁鮓
輒喜舉族受役至死不避嘗令入山採鶴頂象齒犀
角皆如期而至他姓奪之必不與船人以機取之獻

於王王衣以番綿飼以嘉實狢以非其主終不附然
近煙火則淚目而死。旭按狢或名狢狼

狸猴獸

坤輿外紀 額第約必牙有狸猴獸上截如狸下截
如猴色如瓦灰腹如皮囊遇獵人逐之則藏其子於
皮囊內窟於大樹中。旭按坤輿外紀又言蘇木國
有異獸前半似狸後半似狐鼻耳人足腹下有房可
張可合其子恒在房中乳時方出亦此類也

禺

正字通

禺似猴而大赤目長尾

幽鵩

北山經 邊春山有獸曰幽鵩狀如禺而文身善笑
見人則卧 註幽鵩或作嬾嬾

長右

南山經 長右山有獸曰長右狀如禺而四耳音如
吟見則其國有大水。旭按正字通作長舌

足訾

北山經 蔓聯山有獸曰足訾狀如禺而有鬣牛尾
文臂馬蹄見人則呼

狐

駢雅 阿紫狐也

西番譯語 狐西番呼瓦

格物論 狐形類黃狗而小鼻尖尾大捕之者多用
且○旭按狐北方最多毛黃色腋下毛白謂之狐白
亦有純白者然絕難得純黑者曰元狐尤少

談薈 狐不二雄

元中記 狐五十歲變婦人百歲變美女及丈夫惑
人千歲則與天通爲天狐

格致鏡原 千歲之狐姓趙姓張五百歲狐姓白姓
康

酉陽雜俎 狐欲爲怪必取髑髏置首搖之落者棄去不落者戴之始能變人

廣異記 呼伊祈熟肉四字可辟狐魅甚有驗

如是我聞 凡狐皆可脩道而最靈者莫如狢狐狢狐乃已成道者所生。旭按或說脩道之狐每夜煉丹其丹從口中出望之如火毬視丹之大小可卜道之淺深

支雅 山中戌日稱成陽公者狐也

九尾狐

瑞應編 九尾狐赤色四足九尾出青邱國食之不

逢妖邪之氣及蠱毒之類。旭按東山經云鳧麗山有蠶姪似狐九首九尾虎爪食人卽此廣雅名螭蠶天髑

物類相感志 天髑似狐赤白色尾大有君臣父母兄弟之別行次老少食必相讓俗云天惡虎狼殘暴生獸師以教之教之不得哀鳴而去天曉相率號高峯之上或云獸師教獸不得上訴於天也

射干

文選註 射干似狐能緣木

朱獮

東山經 耿山有獸曰朱獳狀如狐而魚翼鳴自設
見則有恐

獳獳

東山經 姑逢山有獸曰獳獳狀如狐而有翼音如
鴻雁見則旱

獳

正字通 獳胡犬似黑狐頭生一角身長七尺老則
有鱗食虎豹獵人亦畏之。旭按談薈云獳有兩種
一種能食虎豹一種是胡犬不能食虎豹

乘黃

海外西經 白民國有獸曰乘黃狀如狐而背生兩
角乘之壽二千歲

狸

續廣雅 不來狸也

本草綱目 狸有數種大小如狐其毛雜黃黑而有
斑如貓圓頭大尾者爲貓狸善竊雞鴨其肉臭不可
食。旭按卽野貓

內則 食狸去正脊

支雅 山中寅日稱令長者狸也

虎狸

本草綱目 虎狸斑如貙虎尖頭方口善食蟲鼠菓
實肉不臭

山狸

八紘譯史 阨入多產山狸形似麝膾後一肉囊有
香滿則就石上剔出

坤輿外紀 山狸香如蘇合油黑色得之療耳疾

海狸

本草綱目 登州島上有海狸狸頭魚尾能入水化
魚

風狸

本草綱目 風狸卽十洲記之風生獸廣州異物志
之平猴嶺南異物志之風母酉陽雜俎之狢狢也出
徼外啖薰陸香晝則倦伏夜因風騰躍甚捷其腦及
尿治風疾奇效

酉陽雜俎 狢狢大者重十斤狀似獺其頭身四支
了無毛唯從鼻上竟脊至尾有青毛廣一寸長三四
分獵得者斫刺不傷積薪焚之不死以大杖擊之骨
碎乃死

十洲記 風生獸取其腦和菊花服之盡十斤壽五
百歲

抱朴子 風生獸鍛死得風便活惟以石菖蒲塞其鼻則不復生

嶺南異物志 風母常持一杖指飛走悉不能去見人則棄之人獲得擊打至極乃指示人人取以指物所欲如意

霏雪錄 風狸糟食尤佳

火狸

桂海虞衡志 火狸出邕州毛色如金錢豹

香狸

酉陽雜俎 香狸取其水道連囊以酒澆乾之其氣

如真麝。旭按此卽本草拾遺之靈貓南海異物志之靈狸楚詞之文狸王逸所謂神狸也其狀似狸毛黃黑色似豹文尾與五段狸相似但色不甚鮮明而節亦無定數有多至十數節者其囊有香如麝人呼香貓其體具陰陽南山經云宜爰山有獸曰類狀似狸而有髦自爲牝牡食之不妬卽此

囊狸

海錄雜事 囊狸出賀州形類犬青黃色

五段狸

廣雁蕩山志 五段狸尾有黑白文相間各五段肉

可食。旭按今處處有之其狀似香狸而脊上有黑毛甚長頗類豬鬃人又呼青鬃其近首處兩邊有黑斑文又呼斑脊

九節狸

天祿識餘 九節狸一名虎僕。旭按卽花貓也產湖廣其狀似虎狸而黑質白章金眼尾甚長有九節文能捕鼠皮可爲裘毛亦堪作筆

玉面狸

廣輿記 玉面狸產浙江金華府。旭按玉面狸捕鼠勝於貓人畜之飼以果實又名果子狸其尾如牛

又名牛尾狸

狢

本草綱目 狢似貓狸而小居澤中食蟲鼠及草根

梁渠

中山經 厯石山有獸曰梁渠狀如狸而虎爪見則有兵

天狗

西山經 陰山有獸曰天狗狀如狸而白首

𤝵𤝵

中山經 霍山有獸曰𤝵𤝵狀如狸而白尾有鬣畜

之已憂

謹

山海經圖 謹狀如狸一目三尾出翼望山

𧸑

異物志 𧸑出朝鮮狀似狸蒼黑色無前兩足能捕
鼠。旭按自來說膾膾獸者往往與𧸑混然膾膾獸
水居𧸑陸居似非一種

爾雅 𧸑無前足 註晉太康七年召陵扶夷縣得
一獸似狗豹文有角兩足卽此

貉

名物考 楚蜀界中多貉俗呼野馬其皮紋上圓下方旁如魚鳥狀寢其皮者設有警急則毛豎起。旭按貉爾雅作獬郭註云江東呼狹狹又貉子爾雅作狙爾雅翼作狙李時珍云作狙者誤

正字通 貉似狸銳首尖鼻斑色毛深厚可爲裘墨客揮犀 貉行數十步輒睡惟擊竹以警之乃起繼而復睡

本草綱目 貉與狗獾同穴貉出則獾隨之

鄉黨萃珍 貉善攻岸修隄防者惡之

麇

中山經 扶豬山有獸曰麇狀如貉而人目

獼

爾雅 獼似狸 註今獼虎也大如狗文如狸○旭
按大者爲獼豺見上文獼獼似狸註

字林 獼似虎而五爪

字典 獼以立秋日祭獸王者亦以此日出獵還以
祭宗廟故有獼膾之祭

破鏡

漢書郊祀志註 破鏡食父其狀似獼而虎眼

獼獼

爾雅 猯類 羆虎爪食人迅走。旭按述異記云
猯猯龍頭馬尾虎爪食人長四百尺然則郭氏子虛
賦註所謂猯猯似狸長百尋者卽此類與

貓

妝樓記 貓一名女奴

談薈 貓一名啣蟬

幼學句解 貓一名家豹又名烏圓

本草綱目 貓一名家狸俗傳牝貓無牡但以竹箒
掃背數次則孕或以斗覆貓於竈前以刷箒頭擊斗
祝竈神而求之亦孕其孕二。旭按今鄉間有一

種柿貓狀與貓無異尾甚長喜食柿故名又名杜龍
肉可食友人邵佐元云此物腸直每食甫入口即從
後竅出

正字通 貓睛子午卯酉如一線寅申巳亥如滿月
辰戌丑未如棗核

埤雅 貓鼻尖常冷惟夏至一日煖

山堂肆考 貓口中有九坎則四季能捕鼠

致富全書 貓露爪能翻瓦腰長會走家面長雞種
絕尾大嬾如蛇

酉陽雜俎 貓洗面過耳則客至

格致鏡原 貓種出於西方天竺國不受中國之氣
故死則挂樹上

鳥獸續考 貓過金山則不捕鼠厭者於其處剪一
紙貓投水中則不忌

支雅 貓糞腐錫

利濟外編 貓齧取薄荷汁塗之良

清異錄 武宗呼貓曰鼠將

亞爾加里亞

八紘譯史 亞毘心域產亞爾加里亞形似貓尾後
流汗若沾於木乾之以刀削下便爲奇香

獺

孟子註疏 獺形如貓。旭按獺有兩種有山居者善緣木曰木獺有水居者喜食魚曰水獺其毛有青灰者有紫黑者有純白者今處處有之其狀並類貓扁頭短足尖喙修尾其肝葉無定數或說生一月則肝一葉兩月則兩葉至十二月則爲一大葉旁又逐月而生小葉又西域產一種元獺歲採入貢談薈 水獺骨含之下魚骨鯁爪亦良

字說 獺以正月十月祭魚

埤雅 獺取鯉於水旁四方陳之而勿食謂之祭魚

山獺

赤雅 山獺獠人呼插翅春其骨能續斷骨驗法令婦人擦手呵氣取至掌心骨必跳舞否則贗。旭按此與上山居之獺不同

桂海虞衡志 山獺出宜州陰莖爲補助要藥性淫毒山中有此物牝獸皆避去若無偶則抱木而枯獠獠尤貴重骨能解藥箭毒中箭者研骨少許敷之立消一枚值金一兩殺死者劣

齊東野語 山獺見婦人必抱以就淫故猺女春時成羣入山誘之

海獺

本草綱目 海獺皮爲風領亞於貂其狀馬頭自腰以下似蝙蝠其毛似獺大者五六十斤亦可烹食陳藏器曰生海中大如犬腳下有皮如胼胝。地按卽獺獺也又名獺獺又名海虎其毛頗深厚

兔

續廣雅 明視決鼻鼷扶兔也

西番譯語 兔西番呼納思

本草綱目 兔梵書名舍伽陳藏器曰八月至十月可食蘇恭曰冬月取兔毛遇難產者燒灰服之卽下

談薈 四川廣東無兔

古今注 兔口有缺尻有九孔。旭按兔狀與碩鼠無異但眼不紅其毛黃褐色孕五月而生其胎藏於項下肉味亦同碩鼠而無脾與膽

論衡 兔舐雄豪而孕

觚賸 兔雌雄孳尾無異他獸每月一孕子生則以土培之而壅其穴出入必然或竊啟其戶子輒不成乃知古所謂視月者乃視月之候而孕又謂吐生者乃得土而生後人訛土爲吐也

飲膳正要 臘月取兔頭煎湯浴小兒則出痘稀少

花鏡 兔壽可千歲五百歲則白

淮南子 孕婦見兔而子缺唇

支雅 山中卯日稱丈人者兔也

狡兔

拾遺記 昆吾山有狡兔狀似兔而雄黃雌白食銅
鐵取其肝膽鑄爲劒切玉如泥

吼

二申野錄 弘治十二年西番貢一吼形類兔兩耳
尖小長尺餘獅子作威時牽吼視之獅子不敢動蓋
畏其溺着體卽腐也然吼雖猖獗而性畏雄鴻鴻若

引吭高鳴則亦不敢動。○旭按十洲記云漢武帝時月支獻一獸形似狸而色黃鳴則人獸皆驚佈名猛獸能制獅子虎豹及一切鬼魅疑卽此

園狗

海內經 南方有青獸如兔名曰園狗

兔

中山經註 兔似兔鹿腳毛青色

狢狢

東山經 餘峩山有獸曰狢狢狀似兔而鵠目鵠喙蛇尾鳴自呼見則其國有螽蝗

訛

神異經 西南荒中有訛狀如兔人面能言常欺人
言東而西言惡而善肉美食之者言不真一名誕

鼠

本草綱目 鼠喙尖善穴故南陽人呼鼯鼠其壽長
故俗呼老鼠其性多疑故又呼首鼠嶺南人呼家鹿
其膽在頭汗可治耳聾然纔死卽消不易得也其爪
前四指而後五指

正字通 鼠一名耗蟲。旭按今又有呼夜蟲者

西番譯語 鼠西番呼席瓦

支雅 鼠生子應月如正月一子二月兩子

博物志 鼠食巴豆三年重三十斤

異苑 鼠食死人眼睛則爲鼠王

駢雅訓纂 鼠壽百歲則色白名曰仲能善憑人而

卜知一年中吉凶及千里外事

太平廣記 鼠齧上服有喜

彙苑 鼠咋人衣帽大吉

抱朴子 山中子曰稱社君者鼠也知其名則不爲

害

天鼠

廣輿記 天鼠出西番。旭按天鼠大如貓皮可爲裘古所謂天鹿裘也今人名舍刺孫

地鼠

本草綱目 鼯鼯似鼠而小卽今地鼠。旭按此卽食物本草所謂大如蠶豆之鼠也又鼯鼯爾雅註作鼯鼯又名鼯鼯正義云卽鼯鼠也然與食牛角之鼯鼠異

山鼠

韻府 倭國有山鼠大如牛。旭按此卽爾雅之鼯鼠秦人謂之小驢者也郭璞傳作驢鼠高士傳作偃

鼠廣韻作鼯鼠其狀似鼠而大如牛象腳驢蹄毛灰
赤色胸前尾上白色晉書又謂之隱鼠異物志謂之
鼠母或說其毛落田間悉成小鼠

海鼠

事物紺珠 海鼠大如豕而目赤重百斤或四五百
斤亦畏貓

水鼠

雲仙雜志 水鼠似鼠而小穴水旁食菱芡魚鰕○
旭按水鼠鼻尖毛黑色處處有之

火鼠

灤陽續錄 火鼠生炎洲火中續其毛爲布入火不
燃今洋舶多有之。旭按此卽十洲記之火光獸也
其毛績布汚則以火燎之卽潔名曰火浣布

冰鼠

灤陽續錄 冰鼠生北海冰中嚙冰而食歲久大如
象冰破卽死。旭按此卽神異經之鼯鼠也其皮爲
裘褥能卻寒

仙鼠

正字通 仙鼠棲息簷下又名簷鼠。旭按卽蝙蝠
也其狀似鼠而有翼與足尾相連毛灰黑色今夏月

有之好夜飛人又呼夜燕又吳地記云洞庭有二穴
穴內蝙蝠悉大如鳥又坤輿外紀云印第亞有蝙蝠
大如貓

輜軒絕代語 蝙蝠關東曰服翼或曰飛鼠或曰晷
鼠或曰仙鼠北燕曰蠟蠅

談薈 蝙蝠好於人口上服人精氣以求長生其血
滴眼中能夜視

江南餘載 千歲蝙蝠色如雪目如珠集則倒懸腦
重故也服之可長生。旭按博物志載唐陳子貞食
蝙蝠大瀉一夕而死又宋劉亮食白蝙蝠亦立死據

此則長生之說乃方士欺人語也

虎鼠

通雅 虎鼠彙類一名鼯鼠。旭按鼯鼠卽說文所謂胡地風鼠也其鼠見虎過必拔毛投之令虎潰爛而死故名虎鼠其毛似彙或又名鼯鼠

蝟鼠

支雅 蝟鼠毛順者雄逆者雌。旭按此卽爾雅所謂彙毛刺也其狀似鼠而大其毛如刺蒼白色俗呼刺蝟

本草拾遺 彙肉炙黃食之治反胃

博物志 彙能跳入虎耳而受制於鵲

爾雅正義 彙見鵲則仰腹受啄

青鼠

廣輿記 青鼠產韃靼

白鼠

筠廊偶筆 黃州有白鼠霜毛火眼。旭按此疑卽

廣雅所謂白鼯本草所謂銀鼠色白古名鼯鼠者是也其狀與鼠很無異但耳小毛短色白又今人畜一種洋鼠狀似鼠而甚小亦有色純白者

黃鼠

本草綱目 黃鼠遇晴暖則出坐穴口見人能交前
足如揖狀卽詩所謂相鼠也韓文呼禮鼠又呼拱鼠
古文呼鼯鼠遼人呼貍貍胡人呼令邦出太原大同
延綏沙漠諸地其狀類大鼠色黃而足短善走肉極
肥美村民以水灌穴捕之

西北域記 黃鼠產俄羅斯卽今灰鼠

蕘林伐山 沙鼠黃鼠也

廣輿記 黃鼠產直隸盛京山西鞏鞏等處

松亭行紀 黃花鎮有禮鼠色如鼯而毛淺冬月聚
榛實於穴中作歧穴貯之若倉困然多至二三斗其

榛實皆美好價倍於人所收者

鼯鼠

爾雅翼 鼯鼠好食栗及松皮故夷人呼栗鼠又呼松狗

西番譯語 鼯鼠西番呼席瓦納播

廣輿記 鼯鼠產盛京及韃靼

本草綱目 鼯鼠大如獺而粗尾毛深寸許紫黑色取爲裘帽得風更煖入水不濡遇雪便消拭眯卽出亦奇物也惟近火則毛易脫其毛帶黃色者爲黃鼯帶白色者爲銀鼯。地按或說鼯鼠性最仁愛捕者

每於冬月裸體卧雪中以誘之此物見人則舉羣赴
救乃獲之又詠物詩選載前明湯顯祖詠胡克遜詩
云人言西北邊有獸名爲遜性不喜獸鬪遂巡解其
困獵者知如此設鬪日馴近相愁來解紛陰遭此人
刃食肉寢其皮似貉花文嫩西州貴將吏茵褥厚常
寸萬萬笑何憫猩猩啼莫恨此獸仁有禮錯莫身爲
殉世有麒麟皮爲鞞復何問據此則遜亦獸之仁者
故附誌之

鼯鼠

爾雅

鼯鼠

註狀如鼠而大蒼色。旭按卽松鼠

也其狀似鼠而大尾長與身等毛蒼黃色人畜之袖中亦能捕鼠

爾雅管釋 鼯鼠今本多訛作鼯鼠

竹鼠

字典 竹鼠一名竹鼯居土穴中大如兔人多食之味如鴨。旭按此鼠似家鼠而大毛蒼色尾短如無目細而長前兩足不分指爪其行極遲鈍

本草綱目 竹鼠一名竹狔食竹根之鼠也出南方

苗鼠

廣志 苗鼠小而短尾

鼯鼠

本草綱目 鼯鼠一名黃鼠狼又名鼯鼠又名鼯鼠
又名地猴健捕鼠及禽畜並制蛇虺今處處有之其
狀似鼠而身長尾大黃色帶赤其氣極臊臭其毫與
尾可作筆。旭按爾雅分鼯鼠鼯鼠爲二字典云鼯
卽鼠狼今日狼貓據此則鼯鼠鼯鼠實卽一物

鼯鼠

爾雅 鼯鼠 註大如鼠頭似兔尾有毛青黃色好
在田中食粟豆關西呼鼯鼠。旭按此卽唐風之碩
鼠埤雅之雀鼠唐韻之鼯鼠郊特牲之田鼠也今俗

又呼大眼賊其狀與兔無異但眼紅而有短尾其毛有純白者有純黑者又有褐色者今處處畜之說文云卽五技鼠能飛不能過屋能緣不能窮木能游不能渡谷能穴不能掩身能走不能先人乃誤以鼯鼠爲鼯鼠也

韻府續編 鼯鼠一名樊光

桂海虞衡志 賓州鼯鼠專食山荳根人取其腹乾之名鼯鼠肚研末治咽喉疾甚效

鼯鼠

正字通 鼯鼠伯勞所化狀似鼠長鼻無尾毛黑色

以其常偃伏故一名鼯鼠以其陰穿地中而行又名
隱鼠以其能起地若耕又名犁鼠

鼯鼠

夏小正 正月田鼠出田鼠者鼯鼠也。旭按此鼠
冬藏穴中正月出二月化駕

遼史 田鼠一名地拍

鼯鼠

說文 鼯鼠豹文鼠也

鼯鼠

爾雅 豹文鼯鼠 註鼠文彩如豹者漢武帝時得

此鼠孝廉郎終軍知之賜絹百匹

竇攸家傳 世祖與百僚游靈臺得鼠身如豹文羣臣莫有知者攸對曰此名鼯鼠事見爾雅帝乃賜絹百匹

唐書盧若虛傳 時有得異鼠者豹首虎臆大如拳職方辛怡諫謂之鼯鼠若虛曰非也此許慎所謂鼯鼠豹文而形小於是一座驚服

正字通 盧氏不考爾雅而專信說文其說固非卽如爾雅註所云按野客叢書謂前漢諸書不聞終軍有此語則亦未可深信當以竇攸家傳爲是

爾雅平議 釋獸一篇皆先舉其名而後詳其形狀
豹文二字當上屬鼯鼠

鼯鼠

本草綱目 鼯鼠一名鼯鼠有斑文

鼯鼠

廣韻 鼯鼠聲如犬吠

香鼠

正字通 河南禹州密縣雪霽山有香鼠長寸餘齒
鬚畢具其身有香如麝然踰大路則死

鼯鼠

爾雅正義 鼯鼠小鼠也有螫毒食人及鳥獸皆不
痛人呼甘口鼠又呼耳鼠。旭按此與下耳鼠不同
義鼠

錄異記 義鼠似鼠尾短每行遞相咬尾三五爲羣
見者吉成都有之

鼯鼠

本草綱目 鼯鼠卽跳兔也出契丹及交河北境。
旭按此卽鼯兔也或又呼明月兔

使俄羅斯記 跳兔大如鼠其頭目而色皆鼯爪足
則鼠尾長其端有毛黑白相間前足短後足長行則

跳躍性狡如兔犬不能獲之善穿地作穴若得千皮
爲裘較紫鼯更細

爾雅 西方有比肩獸與邛邛距虛比爲邛邛距虛
齧甘草有難邛邛距虛負而走名曰蜃 註呂氏春
秋曰北方有獸其名爲蜃鼠前而兔後趨則頓走則
顛然則邛邛距虛亦宜鼠後而兔前前高不得取甘
草故須蜃食之今雁門廣武縣夏屋山中有此獸形
如兔而大相負共行土俗名爲蜃鼠

鼯鼠

爾雅註 鼯鼠狀如小狐似蝙蝠肉翅翅尾項脅毛

鼠名二
三
紫赤色背上蒼艾色腹下黃喉頰雜白腳短爪長尾
三尺飛且乳亦謂之飛生聲如人呼食烟火能從高
赴下不能從下上高 正義鼯鼠一名夷由卽鷯鼠
也上林賦謂之飛鷯

駢雅 鷯鷯飛鷯也

正字通 鼯鼠五技鼠也好夜行能飛而生子又名
飛生鼠。旭按五技見前鼯鼠下

廣輿記 鼯鼠產陝西西安府

本草綱目 鼯鼠皮與孕婦臨蓐時執之令子易生

耳鼠

北山經 丹熏山有獸曰耳鼠狀似鼠而兔首麋身
以其尾飛

飛鼠

北山經 天池山有獸曰飛鼠狀似兔而鼠首以其
背飛 註背有長毛能飛。旭按卽飛兔也

易腸鼠

談薈 易腸鼠似鼠而色青黑腹邊有物如腸。旭
按此卽廣雅之鼯鼯也或說一月三吐易其腸

鼯鼯鼠

正字通

鼯鼯鼠生西番山澤中大如獺夷人喜食

之蒙古名答刺不花。旭按此卽齊東野語所謂合邦也。與上黃鼠之名合邦者不同。其肉極肥。以肉一臠置之食物之鼎。物立糜爛。其性畏日。雖隙光射之亦死。皮可爲裘。濕不能透。

字典 鼯鼯唐韻作鼯鼯俗譌作土撥本草從之非紅飛鼠

嶺表錄異 紅飛鼠出交趾背腹有深毛茸茸惟肉翼淺黑色多伏紅蕉花間捕者獲一則其一去南中婦人取爲媚藥

褥特鼠

舊唐書 武德十六年劉賓貢禘特鼠喙大而尾赤
能食蛇有被蛇螫者鼠嗅而尿之卽愈。旭按此疑
卽魏書之辟毒鼠

沙磧鼠

八紘譯史 于闐有沙磧鼠似蝟金色

山枳鼠

本草綱目 山枳鼠似蝟而尾有兩歧

鼯

談薈 鼯夷人名苦朮兀兜

爾雅 鳥鼠同穴其鳥爲鼯其鼠爲鼯 註鼯如人

家鼠而短尾其穴入地三四尺鼠在內鳥在外今在隴西首陽縣鳥鼠山孔氏尙書傳云共爲雄雌張氏地理記云不死牡

尙書彙纂 鳥鼠山在陝西臨洮府渭源縣西二十里

蠻蠻

山海經圖 蠻蠻鼠身鼉首音如犬吠出剛山

乙苟滿

坤輿外紀 乙苟滿鼠類也大如貓生海邊恆以泥塗身令滑使海中大魚食之剖其腹而出。旭按正

字通云海獸曰狒徧體無骨虎誤吞之剖腹而出蓋
卽此

狒

中山經 樂馬山有獸曰狒狀如蝟毛赤如丹火見
則其國有大疫。旭按北山經載居暨似蝟而赤毛
疑卽此

蝟

炙穀子 蝟似蝟而毫如棘鍼

山狒

本草綱目 山狒似蝟而兔皮毛褐色

朱瑪納哈

使俄羅斯記 喀爾喀產朱瑪納哈其形似黃鼠而
身短足矮可食

瞎撞

百感錄 西北有獸曰瞎撞其狀似鼯鼠而無目善
聽聞人足音則逃匿不可得。旭按此卽玉篇所謂
鼯鼯也其身極臭貓不食之

黃腰

酉陽雜俎 黃腰一名唐己見之不祥
正字通 黃腰豹子一名穀

駢雅 墀微虔己黃腰也長逐其母。旭按此獸腰
以上黃腰以下黑故名黃腰其狀或說似鼪鼠或說
似豹或說似羊蓋亦不習見之物也能食母又能食
虎豹

狙如

中山經 倚帝山有獸曰狙如狀似鼪鼠而白喙白
耳

難

中山經 甘棗山有獸曰難狀似鼪鼠而文題。旭
按獸鼠未詳